



قلب مفتوح

حكايات من قلب جروبات الستات

منى سعيد



إهداء

إلى كل من ساندني وشجعني ووقف بجوار ..إلى كل من وثق في موهبتي
وآمن بقلمي
إلى أبنائي
إلى أصحابي
إلى أساتذتي ومن علموني
أتمنى أن تنال السلسلة الأولى من قلب مفتوح إعجابكم

منى سعيد



المقدمه

سيقولون لك أن العاقل يتعلم بالتجربه والممارسه...لكني أري أن العاقل حقا ليس بالضروره له أن يحترق حتي يعلم أن النار خطر ولا أن يغرق حتي يتيقن أن البحر عميق وأن السباحه الجيده وحدها...لا تكفي”

العاقل يا ساده،، هو من يتعلم من أخطاء الاخرين دون الحاجه إلى المرور بنفس التجربه ونفس الخطأ**

لذا أحببت أن أنقل لكم تجارب ومشاكل آخرين..وضعهم القدر ودفعت بهم الظروف لخوض تجارب ما..واحتاروا في كيفية حلها..إلى أن فتحت لهم جروبات الفيس والواتس فرصه ذهبية للاستفاده ممن سبقوهم ومروا بنفس ظروفهم دون الحاجه للكشف عن هويتهم... وتعريف الآخرين بشخصيتهم الحقيقيه

وهنا يكمن سر الامان والراحه والطمئنيه..فكثير منا وأعني هنا مجتمع السيدات تحديدا يجد راحته في الفضفضه والحكي عن همومه ومشاكله وساع وجهات نظر تدله علي الصواب ولكن بدون الكشف عن الهوية ودون الاحتياج

للذهاب الي طبيبه علاقات أسرية

فكان قديما...تجد الرساله وصاحبة المشكله ولكنها خوفا من اعلان اسمها
..تكتب مثلا ..صديقه لي حدث معها كذا وكذا او احدي أقاربي تسأل عن

كذا وكذا

الي ان جاءت جروبات الفيس مع التحديثات الاخيره التي قدمها السيد
مارك أطال الله في عمره وادخلت تحديث كتابه الموضوع تحت بند إخفاء اسم
صاحب الاكوت

الحقيقه ..كتابي ليس الهدف منه جمع المشكلات التي تتشابه مع الكثير من
مشكلات اشخاص يعيشوا بجوارنا

لكن الهدف منه إلقاء الضوء علي الردود ..وأراء السيدات ممن عاشوا نفس
الموضوع او لديهن خبره سابقه ويستطيعوا توجيه صاحبه الحكايه الي طريق
الصواب وهذا من باب أسأل مجرب ومتسألش طبيب

تعالوا معنا نسمع حكايات الصديقات التي منها ماهي حكايات حقيقيه سمعتها
بأذني من اصحابها واعدت سياقها الدرامي لتظهر اليكم بطريقه ممتعه في السرد
ولنستفيد جميعا من الردود والآراء التي قد تتفق او تختلف معها،وهذه سنة
الحياه

جروبات الستات يا ساده ..مليئه بمئات التجارب والخبرات .. وطرق التعلم
وخصوصاً

أبواب المشكلات النسائية علي غرار . باب أريد حلا والذي كان قديما في
الصحف القوميه كالأهرام وأخبار اليوم



حكايات من قلب جروبات الستات

نقلتها لكم وأضفت عليها الحبكه الفنيه وخيال المؤلف لنعيش المشكله بشكل
درامي مشوق...ونقلت معها ردود أصحاب الخبرات من النساء لنستفيد ونتعلم
جميعا ونستطيع معا تكوين مزيد من الخبرات البشريه في العلاقات الانسانيه
فهيأ بنا مع السلسله الاولي من مجموعتي (قلب مفتوح)
والتي أتمنى أن تنال إعجابكم

بقلم...منى سعيد





الدكاية رقم (١)
أنا وصاحب أخويا والشتيطان



أيوه انا ضعفت وخونت جوزي وفكرت في نفسي ونسيت ولادي وسمعتي بس أنا إنسانه ..ورغم إن أختي نصحتني إني مقولش علي اللي حصل إلا إني صممت وحكيت لجوزي علي كل حاجه وكانت النتيجة زي ما هتشوفوا دلوقت.

.....

أسمي (هند) عندي ٢٨ سنه متجوزه من دكتور اسمه (محمد) وعندي ولد وبنت .. جوازنا كان تقليدي جدا ومفيش اي سابق معرفه بيني وبينه..لكن أهلي شافوه حد محترم ومستواه المادي كويس وعريس ممتاز ووافقوا عليه بسرعه جدا بس أنا كنت متعلقه بصاحب أخويا،، وفي بينا نظرات متبادله، وحب مش صريح ومكنش في أي كلام او علاقته وعلشان كده قررت أفكر بعقلي وأتجوز العريس الدكتور اللي كان متقدملي وخلص

وبعد سنين من الجواز وشعوري بعدم الراحة ولا السعاده مع زوجي .. بالرغم انه حد كويس إلا انه مشاعره دايمًا كانت مكتومه ،،، ومكنش بيشوفني ، ولا ببندل محمد علشان يسعدني .دايمًا وقته وفكره لشغله وبس. وأنا مضمونه وأخر أهتاماته .ولما كنت بتكلم معاه كان دايمًا يتهمني إني مخي صغير وإني فاضيه ،،، ولازم أشغل وقتي بحاجه مفيده ؛؛وده كان بيضايقتني أووي ويوجعني ويخليني أكتم في نفسي ..لحد لما لقيت نفسي فجأه بفكر في صاحب أخويا اللي قولتللكوا عليه

بدور علي تليفونه. وبسأل بطرق غير مباشره عليه و هل أتجوز ولا لا ؟؟؟ لحد لما وصلته واتكلمنا ،،، ويقا في ما بينا تليفونات واتصالات وغيره ولأن الشيطان مش ممكن يسبب حد مشي في طريق غلط إلا ولازم يوقعه

في شر أعماله

حصل مقابلات في شقته غضب عني...ومره جرت وراها مره لحد لما
أكتشفت إني حامل منه

وهنا أبتديت أفوق لنفسي ..وأنتبه إني غلطت في حق نفسي وحق ولادي
وحق جوزي

تعبت من العياط والاكثاب،، وبقيت كرهاه وكرهت نفسي كمان،، وحسيت
إني لو متكلمتش مع حد وفضفضت ممكن أتتحر وأتقي بغلط في حق نفسي للمره
التانيه ***

جريت حكيت لأختي لأنها أقرب الناس ليا ..ونصححتني إني مجبش سيره
لجوزي وأبعد عن الشخص الاتاني اللي كان كل همه يستمتع معايا وخلص من
غير ما يشوف انه بكده بيأذيني

حاولت طبعا كتير أنزل الجنين ومعرفتش؛؛

أختي راحت من ورايا للشخص ده ..وإتخاقت معاها.. وهو أنكر كل شيء
وأنكر حتي علاقته بيا وعملي بلوك من كل حاجه وغير تليفونه لما عرف إني حامل
وخاف لحسن أقول لجوزي أو أخواتي الرجاله

وبقيت كل يوم بموت وبتقطع وعندي إكتئاب وباخد برشام وأدويه ليل نهار
علشان أنزل الجنين

وأخيرا قررت أحكي لمحمد جوزي بكل صراحه يمكن يموتني وارتاح
في الأول أفتكرني بكذب ،،،،ومصدقنيش...وجاله شبه صدمه من كلامي
... وبعدين أتندي يفوق ويكذب نفسه ويكذبني ..وبعد يومين ساب فيهم البيت



ومحشد كان عارف راح فين وعمل فيهم إيه .رجع تاني
و كان تصرفه اغرب مما كنت أتخيل
قعد تحت رجلي بيكي زي الاطفال ويقول لي عملي كده ؟؟دنا بحبك
وبعشقك ..ومليش في الدنيا غيرك!!!!!!

ولما قولته إني هموت نفسي ،،، صرخ في وشي ،،، وقال لي .. مش هتعملي حاجه
في نفسك وربنا غفور رحيم وهتسيبي الحمل ده..... طبعا اي حد ممكن يسمع
عن تصرف جوزي ميصدقنيش ومعكم حق انا كمان أستغريت تصرفه هو حد
عاقل طبعا لكن كنت متوقعه منه يضربني أو يطلقني أو حتي يقتلني بس والله
هو ده اللي حصل

السؤال دلوقت علشان انا هتجنن وخايفه جدا
... هو بيعمل كده ويجهز لي إنتقام؟ ولا بجد غفري وسامحي؟؟
انا نفسي الحمل ده ينزل ،، ونفسي أتوب لربنا عن الذنب الكبير. ده بس
مش عارفه

أرجوكوا ساعدوني .. وبلاش كلام فيه تجريح او تأنيب ،، لاني علي الاخر
وعارفه ومعترفه إني غلطانه

التعليقات

(comments)

f اميره المهندس ردت علي صاحبه المشكله

لا حول ولا قوه إلا بالله بصراحه تصرف جوزك كله شهامه ورجوله وغير
متوقع إزاي قدرتي

تخوني الراجل الطيب ده ؟؟؟.عموما ملوش لازمه الكلام... لازم تتويي لربنا
وتستغفري كثير،،، وتسمعي

كلامه وتشوفي هو عاوز ايه وتستسمحيه لحد لما يرضي عنك وبطلتي تفكير
في الموت والانتحار

علشان ولادك محتاجينك وبلاش تعالجي الغلط بغلط ثاني

f ثناء مجدي...

انا مش فاهمه بصراحه إنتي عاوزه ايه .؟؟ربنا سترك ليه تفضحي نفسك
مكنش ليه لزوم تحكي لجوزك وكان ممكن ترجعي لدار الافتاء وتشوفيم هيقولو
ليكي إيه !!!

f بسمه المهدي...

تصرف جوزك فيه غرابه وقلق ،،،مش تصرف راجل شرقي ،بس يمكن



حكايات من قلبه جروبات السنات

يكون فعلا حبه ليكي منعه انه ياذيكي لما عرف خيانتك ليه
توبي واستغفري كتر الحسنات بأذن الله هتمجي السيئات
وركزي مع ولادك وإدعي ربنا يخلصك من اللي في بطنك ده

f ساميه صلاح ..غلطانه في حق ربك ونفسك وسينتي روحك لشيطان
باسم الحب والقلب وهو لو كان يبحبك مكنش عمل فيكي كده
وعلي العموم كل الذنوب ربنا بيغفرها إلا ذنوب العباد خليكي تحت رجل
جوزك وراضيه وأعتذريه وشوفي هيعمل ايه

f رد الكاتبه من وجهه نظرها

شوفي يا هند مفيش حد فينا معصوم من الخطأ.كلنا بنغلط وكلنا بنضعف
بس بيختلف درجات
الضعف من واحد للثاني.الناس اللي إتني شيفاهم ماشيين في الشارع دول
..ربنا ساترهم بس...لكن لو كشف عنا وعنهم غطاء ستره هتشفو فيهم ملايين عبر
وغلطات ومدارين ورا وشوش الصلاح
والايمان..

اولا.. لازم تعترفي بخطأك وتوبي لله سبحانه وتعالى والتوبه اساسها الندم
علي ما فعلتي يعني مش مبسوطه ولا سعيده باللي عملتيه ..بالعكس أنا غلطانه
يا ربي ومكنش لازم أعماله
ثانيا ..تتصدقني وتكثري من الدعاء والصلوات والصيام علشان ربنا يغفر لك

قلبه مفتوح

ويتقبل توبتك

وده حق ربنا وباذن الله يغفر ذنبك ويقبل توبتك
أما حق زوجك وأولادك فلازم تحمدي ربنا إن جوزك طلع راجل عاقل
وباذن الله ميكونش بيخطط إنه
ياذيكي أو يعمل فيكي حاجه .هو بس فكر بعقله ووجد انه لو عمل فيكي
حاجه هيخسر نفسه ومستقبله وعياله وهيتفضخ معاكي
فلازم تعيشي خدامه تحت رجليه ودايما تطلبي سماحه وتشيتيله إنك أم صالحه
لأولاده

وكان الفراغ يا هند كان أهم مدخل للشيطان ومش بقولك كده علشان
تدوري علي شغل وتخرجي
بالعكس أنا عاوزاكي تفضلي في البيت وتنشغلي بأي عمل أو علم بس من
البيت.. وتنتهبي جدا لأولادك وتنسي ما فات
وتمسحي أي حاجه بينك وبين الراجل ده ،،وبلاش تتكلمي في الموضوع ده
مع حد ثاني
ربنا يتقبل توبتك ويرزقنا ويرزقك الستر ..والعفو والسماح ويهديلك زوجك
ويباركلك فيه





الحكاية رقم [٢] زوجي متعدد العلاقات

زوجي راجل مُلتزم دينيا .. يبتضي الفروض في وقتها ويحج ويعمل عمرات كثير ودايما يتصدق بأمواله ويحب الخير لكنه عنده مشكله الميل للنساء ويحب يعمل صداقات و علاقات معاهم

انا أسمي وفاء .. عندي ٢٨ سنه معايا ليسانس أداپ ومش بشتغل .. متزوجه بقالي سنتين وعندي بنوته عمرها شهرين .. والحمد لله بحب زوجي جدا وبحاول بقدر الإمكان أتقبل عيوبه.. يقولوا عليا في عيلتنا وما بين الجيران إني والحمد لله جميله .. وطباعي هادية و حياتنا بفضل الله مستقره ومشاكلنا قليلة خالص أنا مش مقصرة معاه فأني شئ وبشهادته هو .. وربنا عالم إني بحاول أتعلم ويعمل أي حاجة ممكن تسعده

وكان كنا ناويين نأجل الانجاب بس قدر الله وما شاء فعل هو شغال في بيئه مختلطه يعني الشغل في ستات وبنات وتقريبا كل معاملاته وشغله مع الستات بيشتغل حوالي ١٦ ساعه في اليوم للعلم هو ملتحي ويخطب في الناس وعنده دين وفي البيت كل صفاته كويسة حنين وكريم بس مشكلته إنه عصبي جدا.. وبيتقمص من اقل حاجة، وممكن لو حاجة زعلته يخاصمني بالاسبوع والاتنين يعني زعله صعب ومصالحته أصعب

المشكلة يا اخواتي هي إني بشك فيه جدا وده لاننا من ساعة ماتزوجنا كل شويه أكتشف إنه بيكلم واحده وفي بينهم حوارات أنا دايما بسانده وبدعمه وواقفه جنبه ولما مر بظروف ماليه قبل كده بسبب



إن شغله وقف انا بيعتله ذهبي كله وإديته ليه
لو هتسألوني .. طيب ومع علاقته الكثير دي إتي بتحسي بأيه ناحيته
هقولكم إني متعلقة بيه جدا ومش متخيله إني أبعده عنه.. أو أعيش من غيره
من أول ما إتجوزنا بشهر، كان بيكلم واحدة، وكل شوية على كده.. فكنت
أوقات أواجهه وأوقات معرفهوش حاجة وأدعيه بالهداية
وهو كل شويه يندم ويعتذرلي ويقولني خلاص مش هعمل كده تاني وبرضه
يرجع ويتكلم معاهم

وراح عمل عمره في رمضان وربنا مانن عليه بنعم كثيرة بس دي مشكلته
مفتون جدا بالسنتات كل مرة كان يقولي وعد هتغير.. ولا بيتغير ولا حاجة
لحد لما إكتشفت إنه بيحيب واحده البيت في الوقت اللي بقى فيه عند امي
ولان ربنا أراد إنه يكشف ستره شوفت حاجات في بيتي وعلي سريري
وعرفت أنه كان معاه ست في بيتي
وبالبحث والتدوير وراه زي اي ست بتشك في جوزها عرفت إنها مطلقة
وعندها بنت

وللأسف هي بتتواصل معاه،،،، أنا بجد قرفانه جدا منه..ومش طايقه أبص
في وشه.. و خايفة تحمل منه أو يحصل اي حاجة تجبره علي انه يتزوجها رسمي
أنا لما عرفت سألته وهو اعترفلي

مرضتس افضحه قدام اهلي وأمي لان امي ممكن يحصلها حاجة لو عرفت بس
وقت صدمتي كلمت عمي وهو جه ولما حكيتله اتصدم وكان هياخذ رد عنيف
بس لما أتكلم مع جوزي فضل يقوله إنه ندمان وتاب وانتفقوا يقعد عند والده فتره

قلبه مفتوح

لحد ماقرر هعمل إيه ... ومن غير حد مايعرف
وهو فعلا كان في حاجات كتير متغيرة لما حصل كده وكان كل شوية يقولي
سامحيني بس برضو مخدش خطوة قوية
اعمل إيه؟؟ وأتصرف إزاي؟؟ أنا بموت حرفيا وبنتي من تعبي وعايطي
عمالة تعيط وتعباني جدا
أدعولي ربنا يصبرني ويربط على قلبي





التعليقات

(comments)

f اميره صبحي ردت علي صاحبه الاستفسار وقالت لها

تعالى تقسم الموضوع والتناقضات اللي فيه

-انه بيعك ذهبك وعمل حج وعمرة

ده معناه أنه يقصص ريشك وفلوسك ،،، علشان تفضلي مضطرة للعيش

معاه.. أو لو سيبتيه يبقى اتجوزك ببلاش .. الشباب دلوقتي للأسف بيفكر ازاي

هيتجوز البنت وياخد كل حقوقها علشان لما تطلق ما تطولش حاجة

- يظهر الالتزام بالاحية وكلمتين الدين وهو معندوش حرمة للاعراض ولا

حتى خايف على شرف بنته

- أنا باحبه جداا ومقدرش اتخيل حياتي من غيره، بمناسبة ايه، بمناسبة انه

بتاع ستات ؟ و لا بمناسبة أنه ظلمك ومبيعك ذهبك ؟ وده يجي معاه حينته

وكرمه، فين الحنية وهو قاهرهك بالستات، وفين الكرم وهو مبيعك ذهبك ؟

أنت صغيرة وخبرتك قليلة وللأسف اللي جوزوكي معروفش يجيولك حقك،

وأنا شايفه أن لو إتني شرياه لسه وهو ده سبب أنهيارك..

سييه برة ما يرجعش البيت نهائي.. إلا لما يجييلك شقة ويرجعك ذهبك

ويجيب شهادة من دكتور يروح معاه عمك انه غير مصاب بأمراض معدية لأن

دي المرة اللي اتتي عرفتها وما خفي كان أعظم.. وأعتقد

إن الطلب ده هيضايقه جداا ويطعنه في كرامته اللي في ظني إنها مش موجودة
بس هي مناظر ..

ويتعهد إنه لو كرر ده تاني يطلقتك ،، وكل واحد يروح لحاله ، ومعتقدش إن
الأنجاب منه حاليًا صح ..

أما لو بنت صح بقي ..

تشتراطي عليه كل ده وتخدعيه .. وأول لما يرجع ذهبك .. تطلي الطلاق لأن
اللي زيه لن يستقيم له حال

أحلام ماهر ردت علي صاحبه الشكوي وقالت 

أخد الذهب ليه وباعه ليه ،؟؟ أعتقد المفروض تدخلني أهلك ويرجع الذهب
اللي جابه ، هو واضح انه شايف إن مفيش عواقب للي بيعمله فينتصرف براحته
وإنتي صغيرة ومفيش أي خبرة ..يبقي لازم

الكبار بتوعك اللي يتدخلوا ومفيش حاجة إسما ندمان وهيتوب في حاجة
ان لازم يتاخذ عليه ضمانات مادية عشان مايكررش القرف ده ،،،الله يعافينا
،،،وكمان اتني لازم تحرصي عشان ممكن الله أكبر ينقلك اي مرض معدي ، لازم
تدخلني اهلك وتاخذوا موقف قوي وإنتي ماتتراجعيش عن اللي اهلك يتفقوا عليه
ولا قلبك يجن لان بعد كده ولادك هيدفعوا معاكي الثمن وعندك بنت ربنا يحفظها
مش عايزين القرف ده يترد فيها الله أكبر



رد الكاتبه من وجهه نظرها علي صاحبة الشكوي وقالت ...
الأمر عظيم ولن أهون في حجم الجرم الذي حدث
ولكن يا حبيبتى لكل منا مواطن ضعف وشهوة وكما تقولين زوجك صالح يعلم
أمور دينه وأنتى تحبينه حبا جيا كما الواضح
فلا تملي من الدعاء أبدا أبدا ،،وعسى الله أن يتوب عليه كما تاب على غيره
وليس ذلك على الله بعزیز
وأذكرك بتوبة الفضيل بن عياض وغيرهم ولنا فيها عبرة
فلا تياسى ولا تملي الدعاء فى كل طرفة عين وبصدق من قلبك فالله لا يرد
صادقا دعاه
وأما الخطوات العملية فإن كان يستطيع تغير عمله والعمل مع رجال فليفعل
مادام نقطة ضعفه النساء
وإن لم يكن بالإمكان الآن فليسعى وليحاول وليقتصر الكلام اثناء العمل
وفقط وألا يتحدث هاتفيا معهم درءا للفتنة إن كان صادقا حقا فى توبته
ولعل الله يصلح قلبه ويعفه عن هذا الإبتلاء
ولا تنسى عليكى بالدعاء
وربنا يربط على قلبك ويصبرك



حكايات من قلبه جروبات السنات

انا ست مطلقه منذ حوالي خمس سنين ..إتحملت المسؤولية كامله وقررت إني أقوم بتربيه ولادي لوحدي من غير ما ألجأ إلى أبوهم ..لانه قرر انه يبعد عن المشاكل ووجع القلب ويعيش لنفسه وبس ودايما كت حريصه إني مرجع لوش في اي مشكله تخص ولادنا، علشان ميحسش إني فاشله أو ضعيفه أو حتي محتجاله..

بس المره دي الموضوع أكبر مني ومن أي حد وعلشان كده أنا بكتب لكم يمكن حد يساعدي ويقول إيه وأتصرف ازاي !!!
بنتي عندها ١٣ سنه إكتشفت من شهر أنها على علاقه بشاب عنده ٢٢سنه وبيتكلموا سوا من شهر وبتبعته صور ليها وكان لقيت لها فيديوهات بعتهاله باشكال صعبه ومخزيه..

لحد لما الموضوع إطور وحصلت مشكله بينهم مش عارفه إيه هي بالظبط لكن بعث صورها وفيديوهات لاصحابها البنات وطبعازي ما تتوا متوقعين دلوقتي المدرسه كلها بتتكلم عن بنتي

الست مديره المدرسه بعثتلي امبارح وفرجتني علي الصور وقالتي إن البنت حاولت كذا مره تخرج بره المدرسه بعد ما اتخانقت مع واحده صاحبته وضربتها لكن الامن جابها ورجعها للأداره

مديره المدرسه هددتني لو الموضوع ده متحلش هتفصل البنت وتجرمها من دخول الامتحانات

مكدبش عليكوا انا مسكتها من شعرها وضربتها اكثر من ساعه بموت فيها
لأني مصدومه ومتلخبطه ومش مصدقه أن بنتي تتصور بالشكل ده وإن الواد
الزفت ده يعمل فيها كده

وهتجنن ليه وإزاي بعث الصور وعلشان ايه !!!!
كل اللي قالتهاولي انه طلب منها تروحله شفته ولما رفضت بعث الصور
وفضحها

انا تعبانه ومش عارفه اروح فين ولمين ولو ابوها عرف هتبقني مصيبه ودي
فرسته علشان ياخذ ولادي ويثبت إني أم فاشله

وخايفه إن المدرسه تكلمه أو حد يحكيلوه . أرجوكوا ساعدوني وقولولي ممكن
أعمل أيه واتصرف ازاي مع البنت ومع الولد الحقيير اللي ضحك عليها

انا قاعده من الشغل ومش بنزلها المدرسه وواخده منها الموبايل بس مش
عارفه الوضع ده ممكن يستمر لحد امتي

هل أعرضها علي دكتور نفسي . هل أبلغ أبوها علشان يتصرف معاها .. هل
أجيب رقم الولد ده واتكلم معاها ولا هكبر الموضوع وأوسعاه

مش عارفه اعمل ايه لاني متلخبطه علي الاخر
ساعدوني بالله عليكوا



التعليقات

(comments)

مي عبد المعبود ردت علي صاحبه المشكله 

طبعا البنت غلطانه إنها تواصلت مع شاب متعرفوش واتكلمت معاه من وراكي بس إحنا مش هنسب المشكله ونمسك في مين غلط ومين عمل ايه وكده المهم دلوقتي انك تقربي منها وتعرفي منها كل حاجه علشان تساعدني ولو قدرتي توصلي للشباب ده وتتكلمي معاه ويكون معاكي أخوكي أو عمك أو باباكي هيكون أحسن علشان تخوفيه وتفهميه أنك هتبلي الشرطه وانه لازم يبعد عن البنت وربنا يكتبلك اللي فيه خير ليكي وليها

اسماء احسان ردت علي صاحبه المشكله 

أطمني حبيتي ومفيلش داعي للتوتر والناس بتنسي مع الايام .مش مهم تنزل المدرسه وممكن تذاكر من البيت ومش مهم يكون معاه موبايل حديث ولازم بالراحه والعقل تتكلمي معاه وتفهميها أن اللي عملته حرام وعيب ،، ولازم تستفيد من التجربه،، بإنها منتكلمش مع اي حد وميقاش عندها ثقه في أي حد وإنتي دايما صاحبيا ..وقربي منها ،،ومتجيبيش سيره لاي حد ..لا أبوها ولا أخوها ولا اي حد وباذن الله تعدوا المحنه علي خير

f ولاء القاضي

واضح إنها بقت مصيبيه وفتنه ماشيه في المجتمع .وبنتك مش أول ولا آخر بنت اسمع انها وثقت في شاب وحصل بينهم حاجه علشان كده لازم وضروري نراقب تليفونات أولادنا أول بأول سواء ولد أو بنت ونتكلم معاهم ومنخوفهمش مننا ونصاحبهم قدر المستطاع ،، ومفيش حد مبيغلطش والأهم إننا نرجع ونعالج الغلط ومنكرروش تاني

f رد الكاتبة من وجهة نظرها على صاحبة المشكله

طبعا أنا حاسه بيكي ومقدره إرتباكك ولخبطتك وحالة الذعر والخوف اللي بتعيشيها

مش بس لانك حاسه بالخذلان، وفقدان الثقة في بنتك ،،ولكن كمان لانك شايله الحمل لوحده وأي غلطه أبوها هيحملك مسؤوليتها وما هيصدق يفرح فيكي ويقول انك معرفتيش تربيها

لكن أنا عاوزاكي تستهدي بالله وتقومي تتوضي وتصلي ركعتين قضاء حاجه وتستغفري فيهم ربنا علشان تنزل عليك السكينه والهدوء وتعرفي تفكري وتتصرفي ضربك للبنت كان رد فعل للمصيبه اللي حطتك فيها ..لكن مكنش هو الحل .فلازم اولاً تقربي منها وتتكلمي معاها بكل هدوء وتعرفيها مدي الغلط والحرام اللي عملته

ربيها علي الحلال والحرام مش الصح والغلط ..ربيها تخاف من ربنا قبل ما تخاف منك وعرفيها ان كل ابن آدم خطاء وخير الخطائين .التواوبون...فخلاص



حكايات من قلبه جروبات السنات

اللي حصل حصل ونبدء من اول وجديد لكن مفيش نزول مدرسه ولا تليفون
لحد لما الدنيا تهدي..ولو عرفتي توصلي للولد ده بسأتي مش حد ثاني وتكلمي
معاه ،،وتخوفيه وتهديه ،،إنك هتبلي مباحث الأترنت عنه ..أعملي كده
وبإذن الله مش هتحتاجي تعرفي أبوها وهي هتستجاب لتوجيهك ونصايحك
كل البنات في السن ده وحتى الشباب بيغلطوا ويدرجات متفاوتة .فهوني
علي نفسك وأستعيني برينا وكله هيبقي تمام باذن الله



الحدائق رقم [٤]
أبوي رافض جواز الأقارب



المشكلة باختصار تخص أختي الكبيره...الموضوع أبتدي من حوالي ١٥ سنه.. كانت أختي وأبن عمي يبحبوا بعض...وكل العيله كانوا شايفين أنهم لا يقين علي بعض وكل الناس كانت منتظرين إن القصة دي تنتهي نهاية سعيدة خصوصا إن أبن عمي كان مومت نفسه في الشغل ليل نهار علشان يقدر يجيب شقه ويجهزها ويتجوز أختي بسرعه ويجيبها كل اللي نفسها فيه لكن أول لما راح يتقدم لبابا،، اللي هو عمه وكان معاه أمة وأخواته وخاله...بابا فاجأنا كلنا ورفضه وقال له أنا مبحبش جواز القرايب،،

ناس كثير تدخلوا أيام وشهور يقنعوا بابا إن الاولاد يبحبوا بعض وإن الأهالي مش هتتدخل في جوازهم وإن اللي بنتك تعوزه هيجهولها بس هو رفض رفض نهائي مفيوش رجعه وحلف بالطلاق من أي أن أختي مش هتجوز أبن عمي!!!!!!!!!!!!

طبعا أختي تعبت نفسيا ،،،وهو كمان أبن عمي تعب أكثر منها..والحياه كانت سودا في وشهم ومش عارفين يعملوا أيه ،،،،، أنا نسيت أقولكوا إن أختي دي ماشاء الله كانت جميله...وذكيه ،،،ومميزه في العيله،،،..ناجحه ومتفوقه وست بيت شاطره ،،،وده كان مخلي كل شباب العيله عينه عليها وعاوزين يتجوزوها...وده كان عامل مشكلة كبيره..لأن ولاد عماتي كانوا عاوزين يتجوزوها ،،،وأبن خالي كان عاوز يتجوزها وأنا أظن إن رفض أبويا لجوازها من ابن عمي اللي كانت بتعبه ويحبها مش علشان موضوع جواز القرايب زي ما هو قال ولكن علشان ميكونش في عداوة بين ولاد العيله

اللي كانوا عايزنها...والله أعلم
لكن العداوة أتخلقت كده وولاد عماتي قاطعوا ابن عمي اللي كان عاوز
يتجوز اختي وبقالهم سنين مبيكلموش بعض
المهم إن ابن عمي أهله غضبوا عليه بعد سنه وخطب واتجوز رغم ان أختي
فضلت سنين ترفض عرسان كثير علشانه ،،،،وحتي بعد لما إتجوز كانت بترفض
عرسان لانها لسه بتحبه...لحد لما مبقاش في عرسان بيتقدموا خالص وسنها
وصل لسن كبير والكلام بقي كثير وسط الأهالي والقرايب إنها كده بارت ومش
هتتجوز ومحدش بقي بيعبرها وغيره وغيره

بفقت عاوزه تتخطب وتتجوز وتعيش حياتها زي ابن عمي ما خطب وعاش
حياته ..

وفعلا إتقدم لها عريس..لكن لا هو من مستواها التعليمي ولا الثقافي ورغم
عيوبه الكثيره إلا أنها وافقت علشان متسمعش كلام الناس اللي بيدبجها كل يوم
أنا كنت وقتها صغيره عندي ١٨ سنه وقعدت أقولها بلاش ده مش
مناسب ليكي بس هي مسمعتش الكلام وصممت تتجوزه

هي دلوقتي إتجوزته بس شايقة الذل والمهانة معاه بيعاملها بأسلوب وحش
جدا ومش بيعترها ولا يقدرها...وطبعا لانه من أهل البلد بتاعتنا فكان عارف
بحكايتها مع ابن عمي وكان دائما يشك فيها ويضربها لو جت سيرته من قريب
أو بعيد

ابن عمي للأسف ساكن في البيت اللي جنب بابا، فلو حصل وجت

قعدت أهديها بكلمتين.. و قولتلها إنسي اللي شوفتية
السؤال دلوقت. هل أقول لأبوي على اللي بيعمله جوز أختي فيها
ولا أسيبها تتهان وتتمرط كده من غير ما اعمل حاجه
أنا نفسي تتطلق وتعيش عيشه أحسن من كده لانها تستاهل أحسن منه
وحياه أفضل بس ده كان النصيب
قولولي يا اصحابي الحل ايه؟



التعليقات

(comments)

ايناس راضي ردت علي صاحبه المشكله
شعورك حلو وطيب إنك زعلانه علي أختك وخايفه عليها بس لو حابه
تتكلمي وتعرفي أبوكي باللي بيحصل معاها لازم يكون باذنها وبعلمها لانها ممكن
متكونش حابه إن حد يتدخل ومش عاوزه تنفصل عنه

راجيه الجنه ردت علي صاحبه المشكله
هيه دي اسوء حاجه فعلا في جوازات الريف والبيوت اللي جنب بعضها
والحياه المفتوحه علي الكل
سعادة أختك مش بس هيكون في بعدها عن الريف وبيت العيله وهيكون
كمان في رضاها واحترامها لدماع جوزها لانه ممها كانت عيوبه هو في الآخر جوزها
،، فياريت تخليها تقنعه أنهم يسافروا او يروحوا
أي حته بعيده عن بيت العمة والخال علشان الغيره والشك اللي جواه ينتهوا

ماجده عبد الواحد
طبعا لازم تعرفي أهلك وأبوكي يعني إيه يضرها في الشارع ؟؟ هيه جاموسه
ولا حيوان ..لازم يعرف حدوده ويلاقيها حد كبير يوقفه عند حده ومش لازم

ترجعي لاختك لانها خايفه منه بس اتي هتكوني بتعملي الصح

ميسون محمد ردت علي ماجده عبد الواحد
لا كده يا ماجده هتخرب بيتها ولازم تستأذن أختها لأنها هي بس أعلم
بمصلحتها

ماجده ردت علي ميسون
والله اوقات الواحده بتكون مسحوره ومغيبه بسبب كم الهموم اللي عندها
ومش عارفه بمصلحتها وتفضل في الدوامه والهم والاهمال ده لحد لما يفوت الاوان

رد الكاتبه من وجهه نظرها علي صاحبه المشكله
الشك والغيره أكثر مرضين يخرّبوا البيوت ويضيعوا الاسر ويسببهم
الشيطان بيدخل ويباخذ راحته
علشان كده لازم نقضي علي أي مفتاح للشك بين اختك وزوجها... وإنتي
لازم تساعديها علي ده

حتي لو إنتي شايفه أنه زوج غير مناسب و.و.و بس ممكن تكون هي بتحب
فيه مميزات إحنا مش شايفنها وطاعته واجب عليها
يبقي تبعد عن أي مدخل للشيطان ومتروحش مكان اللي فيه إبن عمها
حتي لو هتزور أبوها تختار الوقت اللي ابن عمها مسافر فيه وتأخذ حد معاها
وهي رايحه



حكايات من قلبه جروبات السنات

وبكده واحده واحده هترجع الثقه لجوزها وهنتقل الخلافات
ومش محتاجه تدخل أبوكي دلوقت طالما أختك مش حابه ده
إتقوا الشبهات .. وأبعدوا عنها والمكان اللي جوزي مش بيحبه مروحوش
والناس اللي جوزي مش عاوزني أكلهم . ابعدهم
جوزها هو طريقها للجنه وتقدر تكيفه وتراضيه وتأخذ عنيه بالهداوه
وربنا يصلح ذات بينهم وإتي إدعيلهم كثير ..





الذكايه رقم [٥]
عريس بعيله ولاا تجميد بويضات؟



أنا إسمي ساح.... عندي ٣٤ سنه.. متجوزتش قبل كده . ومتقدملي راجل مطلق،، وعنده ٣ اولاد وانا نفسي أوي يكون عندي أولاد ومش عارفه ممكن أتجوز أمتي .لهفتي علي الخلفه والا اولاد مخليلاني راضيه بعيب خطيبير فيه مش عارفه انا صح ولا غلط.. تعالوا احكلكوا وقولولي أععمل إيه بعد ما التفكير تعبني قررت اكتب لكم وانا حيرانه ومحتاجه رأيكم ضروري فارجوكم يا بنات ساعدوني

واعتبروني أختكوا..... لأنني في مفترق طرق في حياتي..أنا دكتورة عندي ٣٤ سنة مخلصه دراسات عليا

مش محببة ما اتجوزتش قبل كده ولا حتى اتخطبت ولا قرئت فاتحة وشوفت صالونات كتير بس محصلش نصيب ..عرفت حد من سنه عن طريق خاطبة حد محترم وشغال في جهة خاصة وأبن ناس طيبين هو من الأقاليم وأهله ناس متحفظين شويه وأنا معنديش مشكله ف ده أهلي كده .!

المشكلة أنه عنده ٣ بنات

ماشاءالله ربنا يحفظهم .. هما معاه مش مع مامتهم لانها راحت اتجوزت ..

هما حياته كلها

وهو بالنسبالهم ماما وبابا أول ما فاتحني في الموضوع كلم والدي على طول من غير لف ودوران ودي أكثر حاجة احترمها فيه وجاب أهله كلهم عندنا واتعرفو على أهلي...وهما بصراحة محترمين وبسيطين ..علاقتنا كانت ف الاول كويسه جدا وخصوصا مع اهلي علاقتهم بيهم ممتازه وهو قدر ينول احترامهم وتقديرهم خصوصا وضع بناته لان اهلي طبعا كانوا خايفين . لأنني أنا اللي هريهم

وانا موافقه و راضيه

محبة مني ليه.. بس مش عايزين يكون ليهم سبب ف قطع نصيبي خصوصا
لاحظو اني حبيته واتعلقت بيه وعلى فكرة هما سألو عليه كويس جدا وكله
الحمد لله قالوا عليه محترم وحتى ف انفصاله عن ام بناته تم بهدوء واحترام
..الفكرة اني اكتشفت مع الوقت ان عنده غيرة شديدة جدا عليا خصوصا إني
شكلي مقبول الحمدلله وشاطرة واجتماعية وناجحة ف مجالي ..طلب مني أشيل
كل زمائلي وكل الصورع الفيس وانا وافقت ك اثبات حسن نية .. بعدها بفترة
بسيطة جينا دبل الخطوبة

وحصل خلاف بينا من قبل ما حتى ألبسها لكن للأسف أفصلناو جه
خدم .. هو رجع كلمني بعدها على طول أنه لسه بيحبني و شاريني وباقي
عليا وعايزني خصوصا انه مش هيلاتي أحن مني على بناته و عارف اني
متعلقة بالبنات وهما متعلقين بيا وربنا عارف إني حبيتهم أكهم بناتي خصوصا كانوا
بيندهوني ماما لأنهم فعلا محتاجين لام.. بس هو صارحني أن موضوع الغيرة ده
مش هيتغير ده طبعه

وبحكم شخصيته وطبيعة شغله.. وانا قولت اوك راجل شرقي... دلوقتي طلب
مني إني ألبس الحجاب شرط أساسي علشان يرجع يكلم اهلي ..انا عارفه
إن الحجاب فرض وكل حاجة ووعدته يوم كتب الكتاب هلبس الحجاب هو
رفض ومصمم ومتمسك إني ألبسه من دلوقت من قبل ما يكلم اهلي.....اعمل
ايه؟؟؟؟... هو معاه حق في طلبه اه بس مش باسلوب الضغط أو التهديد
ده ..انا بين نارين ...أكمل معاه وألبس الحجاب وأ هو ربنا هيعوضني عن تاخر



جوازي ان بيقا معايا ٣ اطفال

وربنا عالم أنا اما بشوف بيبي ف الشارع بيقا هموت عليه وهموت ابقا ام²
ولا ارفض علشان غيرته وتحكماته الشديده واستنى واكمل دكتوراة برا مصر يمكن
ربنا يعوضني بجد تاني

وضعه احسن... على فكره أنا لو مش هكمل معاه هعمل تجميد بويضات
لان الواحد مش ضامن بعد كده

يحصل ايه يامين عالم هلحق اشوف حد تاني كويس و دوغري امتا خصوصا
ان كل اللى قبله كانو بيلعبو وضحكوا عليا... انا محتاجة مساعدتكو وتوجيهك
علشان خاطري من غير توبيخ.. و ربنا مايحرم وحدة
من احساس الامومة ابدأ يارب²

التعليقات

(comments)

ردت أمل عبد الوهاب علي صاحبه الرساله 
بس متقوليش بيعبك دي معلش ! لأن أى حد مكانه هيمسك بيكي جداااا
لأنه معاه ٣ بنات وتربية الأولاد

مش سهله وهو واثق أنه مش هيعوضك وألا ممكنش رجعلك تاني ! ورجوعه
مش إثبات أنه مش قادر يعيش من غيرك،، والله ده قلة حيله تجاه البنات
وضغط من الاهل انه هيلاقى كده فين معلش ؟؟؟ هو راجع عشان إتني فعلا
كثير عليه جدا ومش هيعوضك .. إتني بس وإتني بتحسبها متحطيش الحب
في كفة الميزان لانه صدقيني مش حب اصلا إتني اللي عايزه تشوفيه كده
عشان حبيته

وإلا مكنتيش هتقبلي بكل الاوضاع دى

هدير يونس ردت علي صاحبة الرساله 
في حاجه مهمه جدا عاوزه أقولك عليها . متاخذيش الامور ببساطه،، لأن
مسؤولية الاطفال صعبه جدا لو كانوا بناتك فما بالك
لو كانوا مش بناتك ؟ ده في حساسيه في التعامل وضغط نفسي لا تتخليه
إتني هتبقي بتحاسبي



حكايات من قلبه جروبات السنات

على الكلمه معاهم ..لحسن يشتكو لأبوهم منك ويطلقك عشان سوء المعامله
! ده غير لو ربنا كرمك باولاد ! مش
هتعرفي تعاملي دول زي دول ابداءااا وهتبي عندك بتاع ٥ عيال ! دوشه
وصداع ومسؤوليه كل واحد
طلب ! ومتستبعديش وقتها يقولك سيبي الشغل عشان تركزي معاهم !
واحد بالشخصيه دي متحكم
وعايز كلامه اللي يمشي ، بدأ بعلاقتك بالناس وصورك واحنا كلنا بنوافق
وبنقبل عشان بنحب ، لكن قدام هيتحكم في شغلك نفسه عشان خاطر عياله
وهتلاقي نفسك فوقتي متأخر اوووي واتي شايه نفسك
خسرتي كل حاجه واتنازلي بدون مقابل يستدعي

📌 ريهام السيد ردت علي صاحبه الرساله

بصي هو ربنا بيظهر لك شخصيته واحده واحده اصلا
يعني بمجرد خلاف بسيط أخذ الدبل ده ممكن يبقي بياع .. كتم متفقين
تلبسي الحجاب بعد كتب الكتاب يفرض عليكى دلوقتي غير كلامه معاكى
تالت نقطه إنك بتقولى متحكم وغيور جدااا
رابع حاجه إنه بيقران يا تلبسي الحجاب يامش هيجمي لأهلك ودول اسوء
حاجه ممكن تشوفيم في أى راجل غير طبعا إنك كبت مش هتعرفي تعيشي
حياتك أصلا وفرحتك ببداية جوازك
وارد انه يحصل وتتجوزى شخص منفصل او غيره بس بردو كل ده بجانب



العيال طيب حاجة تشيل حاجة مثلا
التحككات دى وحشة اوى ومش حاجة حلوة بجد وهيضغظ عليكى بأسلوبه

نوال عامر ردت علي صاحبه الرساله 
إنتي لو رجعتي تبقي عاملة زي اللي شايف الحريق و رايح يرمي نفسه فيه...
ده مريض شك و متحك و تلاقيه مطلق أصلا علشان كده الست نجيت
باعصاها و اتجوزت حد غيره ده غير موضوع بناته ده اللي في الغالب إن مكانش
أكيد هيطلعوا عينك

إنتي ولا كبرتي ولا أي حاجه،، عيشي حياتك و سيب الرزق بيحي
لوحد،، من غير جري ورا الموضوع ارجوكي فكري كتير قبل ما تاخدي الخطوه
دي و ربنا يكتبلك كل الخير

ايمان القاضي ردت علي صاحبه الرساله 
! انا اسفه لو كلامي هجومي بس انا بحسسك باللي إنتي داخله عليه كويس
! أنا واحده اتجوزت

و كنت خايفه مخلفش.. و كنت عايزه أتبني أطفال عشان أعيش تجربة الأمومه
والحمد لله اني مستعجلتش فى الخطوه دي ، لان ربنا كرمني ساعتها ممكن مكنتش
أقدر أعدل بينهم وأظلم التانيين فصدقيني متعرفيش بكره شايلك ايه وخوفنا من
بكره ده اللي بيخلينا نتسرع وناخد قرارات غلط جدااا و ربنا
يكتبلك الخير يارب 



رد الكاتبة علي صاحبه الرسالة من وجهه نظرها  أ ستوقفتني في رسالتك يا عزيزتي ما بين السطور التي كتبتها شعورك بأنك غير مرغوب فيكي وأنك فأنك قطر الجواز وأنك لازم تتنازلي وتوافقي لمجرد بس أنك عاوزه تتجوزي وتبقي أم

فعاوزه أنبهك إن الجواز مبني اصلا علي التوافق في الفكر والشعور والحاله الاجتماعيه وغيره ولو إختلت كفه التوافق دي هينقلب الجواز لخناقات ومشاكل ووجع دماغ

الصوره كما شرحتها من وجهه نظرك بتقول إن كفه الجواز مش متكامله فلازم تراجع نفسك وتعرفي

إنك لسه قدامك فرص كثير ربنا واحده اللي يعلمها والمشوار المهني بتاعك مليون ناس هتشوفهم وتعرفهم وأكد هيكون من بينهم حد متوافق ومتكافأ معاكي

فبلاش يا عزيزتي الاستعجال والرضا باي شيء، في الجواز

علشان متندميش ووقتها لا هينفع ولد ولا بنت ..والتفكير في موضوع تجميد البويضات انصحك بانك تتناقشي فيه مع طبيب او طبيبة أمراض نسا ..وهما بس اللي هيكونوا عارفين ده مناسب لسنك وصحتك ولا مش مناسب وبعدها لازم نقاش مع خطيبك سواء اللي بتتكلمى عنه او اي حد آخر



الدكاية رقم [٦]
أنا بكرة أمي [???



أنا بكره أمي جدا وبدعي عليها رغم انها ماتت ..لأنها كانت قاسيه وجامده و عمرها ما حسيستني بالحنان

الحكاية أبتدت لما لاحظت إني بعامل ولادي بقسوه شديد و طول الوقت بعنف فيهم وبفرق بينهم في المعامله ومش قادره أطلع كلمه فيها حنان او حب ليهم زي ما يكون جوايا كبر وعزه نفس ومش عاوزه بيان تجاهم تعاطف أو حنان ولما حسيت إن الاولاد أبتدوا يبعدوا عني ويواجهوني ويعاملوني بنفس القسوه أدركت إني صوره طبق الأصل من أمي وأني بتعامل مع ولادي زي ما كانت بتعامل معايا ...طيب لسييه .وازاااي عقلي الباطن اللي كان رافض معاملتها وكارهها يقنعني اعمل نفس اللي كانت بتعمله

لحد لما اضطريت اروح لدكتوراه نفسيه...ايوه روحت لدكتوراه ..لاني عاوزه أخف وأتعالج ومش عاوزه اخسر ولادي

الدكتوراه أول لما اتكلمت معاها عرضت عليا تجارب ستات كتير زيي وقاتلتي هخليكي تسمعي بودنك تجارب شبه تجربتك وتحكي بنفسك الست الاولى لما اتكلمت في الجلسه قالت كده

قالت انا واحده من اللي مروا بتجربه احساس إن أمها عمرها ما حبتها مع أن كان لها بعض المواقف المحدوده اوي اوي اللي عاملتني فيها كويس أو اشعرتني بحبها

ومريت كمان بإحساس التفرقه ف المعامله بين الاخوات والتجاهل وكل حاجه من معايره لإهانه لاحتقار لسخرية .. لأخواتي اللي منهم اخت كانت بتعاملني أي شيء حقير واخواتي التانيين اللي مكانوش بيحبوني ولا افرق معاهم

خالص ازعل مزعلش اروح ماروحش مش فارق معاهم لاني مكنتش فارقه مع امي..

مع أن أمي نفسها الله يرحمها قاست من كل الحاجات دي من أمها الله يرحمها وكانت برضو أقل واحده ف اخواتها عند أمها

بس عاوزه اقولكم وبدأت تبصلنا كلنا بما فينا الدكتور وهي مبتسمه وبتقول لازم نتعافي تمام من كل شيء سلبي مرينا بيه ف حياتنا وخصوصا لو كان وجع من اقرب الناس لينا

محدش فيهم تعبان... محدش بيتألم نفسيا غيرك انت وولادك واكيد زوجك... وامك سواء عايشه أو ميته .. هي مش فأكره ولا شايفه هي دمرت فيكي ايه ليه تأذي نفسك أكثر مش كفايه الأذي اللي مريتي بيه علي ايد غيرك .. ليه تكلمي علي نفسك واكيد دا مآثر علي بيتك وعلي ولادك و زوجك .. وتلاقي نفسك طول ما انت بتفكري ف كم القسوه اللي شفتيه ... حزينه وباكينه ودا بيتحول تلقائي لنكد علي جوزك وولادك .. ويمكن تكوني من غير ما تشعري بتكرري نفس التجربه مع ولادك من قسوه لتفرقه ..

عن تجربتي الشخصيه انا محسيتش بالرضا واني مسامحه أمي جدا إلا لما قررت اتعافي تماما من كل وجع مريت بيه منها .. قررت اني ما اكونش نسخه تانيه منها .. قررت اني طول الوقت أحضن ف ولادي واحبهم واقرب منهم واطحك معاهم واهزر معاهم واكلمهم عن حبهم لبعض وازاي لازم يجوبوا بعض ويتحملوا بعض ويتقبلوا بعض ... ويشد عليهم برضو وقت الضروره ..



وقت الضروره بسسسسس

حياتي كلها اتغيرت .. بطلب الرحمه لامي من كل قلبي ...
مش عايزه افكر ولا افكر هي عملت فينا ايه ولا اخواتي عملوا ايه .. لاني
برضو اكيد مش ملاك ...

حتي علاقتي باخواتي اتغيرت بقيت بتعامل معاهم من باب صله الرحم .. مش
بحاول اقرب منهم ولا ابعد عنهم .. حبوا يقربوا ويتواصلوا معايا اهلا بيهم .. بعدوا
وقرروا يقطعوني .. كان الله ف عونهم الله اعلم بطروفهم ... بسأل عن من باب
الاجر والثواب لو في حاجه ف ايدي اقدر اقدمها ليهم مش هتأخر ..

ارجووووم اتقوا الله في ولادكم .. بلاش قساوه عليهم... ما تفرقوش بينهم ..
ما تعرفوش القسوه بتكسر فيهم ايه وان التفرقه بتدمرهم ازاي .. اعمالوا معاهم
اللي تمنوا أنهم يعملوه معاكم لما تكبروا وتبقوا اتم اللي محتاجينهم ..
قولوا لهم كلام حلو عن نفسهم سمعوهم كلام نفسكم تسمعوه منهم بعد كدا ..
فرحوهم .. فرحوهم اوي ..

هتفرحوا انتوا كمان .. هيفرق اوي معاكم ومعاهم ... وهيفرق كمان ف نسيانكم
لاي اثار سلبيه لو كنتم مريتوا بيها .. ربوهم بحب
قرروا تطلعوا أبناء اسوياء ..

...

ولحد هنا كانت دموعي بتنزل لوحدها ومش قادره ابطل عياط حاسه ان
كل كلمه اتقالت كانت تخصني وبتحكي عني .. انا فعلا نفسي اتعافي ومش عارفه
..نفسى انقذ ولادي وأنقذ نفسي من الحزن اللي انا فيه

ولما جه الدور على الدكتوراه قالتلى
انا عايزة اقول حاجة لى بتفكر ان امها بتكرهها او بتعاملها بسوء وتفضل
أخواتها عليها

انا مر عليها تجارب كثير جدا جدا كل الحالات البنت ظالمة الام جدا جدا
انا شفت بنت الله يرحمها حاليا توفت اشتكت من امها مر الشكوى ، وهى
كانت بنت وحيدة على ولدين ، وقعدت تحكى لى امى مش بتجبنى ، امى بتفضل
اخواتى عليها وهى متزوجة وعندها طفل لما أصيبت بالمرض محدش وقف جنبها
غير امها ، محدش كان بيتقطع عليها غير امها

يا جماعة دى حالة الشيطان بيخرب بيها العلاقات بين البنت وامها
عشان يزين للبنت حاجات مش حقيقية، ال يحصل معاها كده لازم تطلب
مساعدة وتعالج

ويمكن كان مامتها تاخذ جلسات عشان تصلح العلاقة مع بنتها
أکید مفيش حد احن من الام على اولادها
. ممكن الام تكون واحدة موقف احيانا لان البنت معاملتها سيئة ، مفيش

إحترام للأم

لازم الإشكالية دى تتحل بجد
والشيطان ده بيعد، والنفوس تتصافى
البنت اللى بتشتكى من معاملة امها تشوف امها بس شكلها ايه لما البنت
بتمرض ، أو تخاف عليها

اول واحدة بتنهار عشان بنتها الام ، مهمما كان



إلا بقى لو الام مصابة بلوثة عقلية، وفي الحالة دى هى معذورة
وأخيرا حابه أقولكوا إني أبتديت جلسات علاج نفسي وماشيه علي ادويه
الدكتوراه كتهالي وعلي قد ما اقدر بقيت احاول اقول كلام حلو لولادي واحبيهم
في بعض وبقيت اعتذر واطلب منهم الطلبات بعد ما اقول لو سمحت وبعد اذنك
انا بتغيير علشان ولادي لما اموت يدعولي ميدعوش عليا
ونفسي اوصل لمرحله اني اسامح امي وادعيلها بس لسه شويه
ادعولي اقدر اسامحها

التعليقات

(comments)

ردت زهور العبير علي صاحبه المشكله 
ربنا يعينك حبيبتي انك تتخلصي من الشعور السيء ده وتساهجي امك
وتغفري تقصيرها لاننا كلنا بنقصر مع اولادنا ومبنعرفش هل التريه اللي بنربهم
عليها دي وعلشان مصلحتهم هيفهموها صح ولا غلط

Amany zaki ردت علي صاحبه المشكله
مفيش ام في الدنيا بتبقي عاوزه تأذي عيالها بس في ام حنينه بطبعها وفي ام
بتكتسب القسوه من امها واللي ربتها عليه
خليكي انتي الاحسن وتجاوزي مع عيالك ورائه القسوه دي وخليكي هينه
لينه معاهم وصاحبهم وادعي لامك
بالرحمه والمغفره .لانها في دار الحق ومحتاجه جدا جدا دعواتك

....

رد الكاتبة علي صاحبة المشكله 
معنديش حاجه اقولها لك غير ان القلوب يملكها الله سبحانه وتعالى فادعي
ربنا يخرج من قلبك كرهك
لامك ويبدله بالحب ويذكرك دائما بالحلو اللي كانت بتعمله وينسيكي الوحش



اللي أكيد كان بيطلع منها دون وعي او قصد
وحطي نفسك مكانها ولو لقيتني نفسك تحبي ان ابنك او بنتك بعد مماتك
يكرهوكي ..بيتي خلاص استمري في مشاعر الكره
استغفري ربنا دائما ليها وليكي وتخطي ذكرياتك معاها وركزي في الامور المهمه
اللي تحبي تربي اولادك عليها
وربنا يهدي قلبك ويريح بالك



الدعاية رقمي (٧) حمايتي والبهايم



أوقات بيوت كثير بتتخرب والازواج بينفصلوا بسبب الحموات وانا حاسه
أن بيتي هيتخرب بسببها
انا كرهت عيشتي بسبب حماي بجد ..عاوزاني أخذمها واتعامل مع طلبتها بأنها
اوامر ده غير خدمه (البهايم) وانا متريه في القاهره وبدرس في الجامعه ومش
واخده علي عيشه الارياف ومع ذلك وافقت واستحملت علشان بحب جوزي
انا اتجوزت جوزي بعد قصه حب كبيره اتعلقت بيه وحسيت انه فيه كل
اللي كنت بدور عليه ولما جه يتقدملي ويطلبني من اهلي كان من شروطه إني
اعيش مع والدته في البلد واكمل اخر سنه ليا هناك
الموضوع كان صعب عليا وعلي عيلتي ..فكره اني اتجوز في بيت عيله وكمان
أعيش مع حماي ده كان من رابع المستحيلات
لكن ... حكم القلوب بقي ..مقدرتش اقول لأ..وهو كان وعدني انه مع تحسن
الظروف هنرجع نعيش في القاهره في بيت منفصل لينا وبس
انا حاليا لسه بدرس ف الجامعه ف اخر ترم وقاعدين انا وحماي لوحدنا
ف بيت مشترك وربنا رزقني من كام شهر بولد جميل
زوجي شغله كله فالقاهرة واحنا في بلد ريفيه هوبصراحة شخص كويس جدا
اللهم بارك وبار جدا بأمه وعلشان كده كان عاوزنا نتجوز جنبها علشان هيه
متكونش لوحدها
انا مازلت في الدراسه فاضلي حوالي سنتين وكيتي الدراسه فيها عملي
ومحتاجه مذاكره وتركيز
ونظام اليوم هنا بيكون أنا بنصحي بدري تنضيف وغسيل وترويق وتجهيز

أكل لليوم كله المواعين .وانا علشان دراستي بنصف البيت يوميا او يوم بعد يوم و في الغالب الاكل حماتي هي اللي تعمله مع اني بعرف اطبخ كل حاجه بس هي بتستعجل على الطبخ بدرى يا اما انزل الاقيها عملته يا اما انا بره في الجامعه فهي بتعمله ...

ونبدء من هنا المشكله بتاعتي وهيه اني مش عارفه أرضيها ازاي ؟؟
بتحطني في مقارنات مع حريم اولاد الجيران وشايفه ان كلهم احسن مني بحكم انهم عندهم بهائم

ويصحوا بدري ومن الفجر يقضوا حاجة البيت وانا بشتغل علي قد استطاعتي ومجهودي وموضوع البهائم والطيور ده انا مليش فيه ومبعرفش اعمله وحاولت كتير وفشلت

ده غير انها مستكتره عليا الراحه شايفه اني متدلعه ..انا اصلا كنت بنت وحيدة ف بيت ابويا وكت بعمل شغل البيت العادي مع امي وبس وزى ما بعمله هنا بعمله هنا

ما قصرتش معاها ف حاجه .. دايمًا بتروح تشكي وتندب حظها انها مش معاها مرات ولد زي الناس ومالهش حظ فيا .انا ماعنديش مشكلة ف خدمتها ب (ودا لله وعلشان خاطر زوجي كويس وغير كده حاجات بسيطه مش شغل كتير)

عندها في دماغها مخاوف كتير من ناحيتي بتخاف اسيطر او امشي كلامي عليها وبتكره ان جوزي بيحبني وبتكره ان حد يشكر فيا قدامها ولا يقول كلمة حق عني وعمرها ما شكرت



حكايات من قلبه جروبات السنات

فيا ولو عملت حابه حلوة ما بتروحش تحكيها ولو عملت حابه وحشه (من وجهة نظرها) بتجري تحكيها للناس كلها علشان تبيني وحشه!

مقارنتها للبيوت اللي جنبنا مدمرة حياتهم وحياتنا الناس كان اشتكوا منها لانها بتخرب حريم ولداهم عليهم وتخليهم يكرهوا عيشتهم زي ما مكرهاني ف عيشتي عليها قلبه وش طول اليوم بتخليني مش عارفه اقعد ع بعضي ف البيت ومش طايقه اقعد فيه دايمًا شايفه اني خدت منها ابنا واني بكرهه فيها وباخد كل خيريه مش عايزه اخليه يدي امه حابه مع ان وحياة ابني اللي حاصل العكس تماما انا بوصيه عليها وع اخواته البنات واي مناسبه مع اخواته فرح او حزن بروح اول واحده ومش بستناه هو يقولي روجي.

انا حقيقي بعمل حاجات معاهم وبراعي تفاصيل ماحدث منكم يصدق انها تطلع من واحده لسه عندها ٢١ سنه واصحابها بيلعبوا وما يعرفوش حابه عن فتح البيوت

ده غير ضغطتي في المذاكره علشان أفضل أجيب امتياز كل سنه ومعايا ابني زي ما قولتلكم ف كل دا اصلا ضغط كبير عليا

نسيت اقولكم بسبب ابني معاهها ف ايام الكلية فدايمًا تقول للناس أنها بتعمل كده علشان ابنا وابن ابنا مش علشان خاطري ما بتجش تعمل اي حابه علشاني

الغريب بقي ان دي كمان طريقه تعاملها مع بناتها وهما كمان بيشتكوا منها، وبتكلموا معايا، وبصبروني رغم انها متوصيه بياكتشير كنتشير^[2] جوزي والبنات واقفين ف صفي ويهونوا عليا لانهم عارفينها كويس بس ماحدث قادر يوقف ف

وشها لانها ام وخايفين من غضبها
بلاش الجماعه بتوع انت عملتي ف نفسك كده من الاول لان انا بعمل كده
ومحافظه ع حدودي و ليا شخصيتي (ودا مضايقتها جداااا لو تعلمون) وبعاملها بما
يرضي الله علشان خاطر جوزي كل الفكره اني ماذيه نفسيا منها مش ماذيه من
شغل البيت و اخر حاجه الفترة الفاتت فضلت تقول لأبنا ان انا مھمله في ابني
الصغير و مش برضعه والولد مبینش لحد لما انا فعلا كرهت ارضعه سواء قدمھا او
وراھا من كتر تعب نفسيتي وبقاله مده كبيره على لصناعي وانا قلبي واجعني بجد
وبقيت بخاف من عينها و مش

مسمحاھا في كلامھا عن ابني

عاوزه اقولكم اني كده كده هسافر لجوزي عاجلا ام اجلا باذن الله بس
عايزه اعرف اعمل ايه ف الكام شهر اللي فاضلين امشي الدنيا ازاى علشان ما
تجینیش جلطه؟ ولا اموت بغيوبة نسيت اقولكم اني عندي السكر [?]؟؟؟؟؟
انا صغيره اوي ع الھم دا بجد وصعبان عليا نفسي
خايفه كلامھا ومعاملتها دي تكون سبب في خلاف بيني وبين جوزي فارجوكم
قولولي اتعامل مع الشخصيه دي ازاااااي؟



التعليقات

(comments)

زهرة محمود ردت علي صاحبه المشكله 

حببتي إنتي مشيليه نفسك فوق طاقتها وانتي لسه صغيره اووي علي اهم ده انا شايفه انك طالبه رضا حماتك وده أمر مستحيل ومحتاج معجزه وكان غيرك اشطر طبيعي جدا انك طول ما انتي عايشة مع حماتك او اي حد غريب تختلفوا في طباعكوا .يعني انتي ومامتك أو اختك طباعكوا زي بعض ؟؟

أكيد مستحيل ..فطالما هي شهور وباذن الله تسافري لجوزك ..كبري دماغك واعملي اللي تقدري عليه وبس ومش مطلوب منك انك ترضيها ١٠٠٪ لا يكلف الله نفسا الا وسعها ..وربنا يصلح ما بينكم

ركزي مع جوزك وفي مذاكرتك وكبري دماغك

اسماء مؤنس ردت علي زهره محمود 

...

طيب ماهيه بتقول ان المعامله اثرت علي الرضاعه وعلي حالتها النفسيه بيتقي هتكبر دماغها ازاى ؟

انا شايفه انها لازم تقعد مع حماتها وتناقشها لانها هتسافر لجوزها وترجع

تاني تعيش معاها .وتقرب منها وتشرحلها انها نفسها تراضيا وترتاح علشان هما الاتنين ميتعبوش ودي طريقه كويسه وجربتها بنات كثير ونجحوا

f مني الصاوي ردت علي صاحبه المشكله

انتى اهم حاجه عندك جوزك وابنك اى حد تانى مش مهم وطالما بناتها عارفين انها شخصيتها صعبه بيتي خلاص متزعلش نفسك انتى واهتمى بصحتك حبيبتى

f ابتسام محمد ردت علي صاحبه المشكله

انتى عارفه ان فى حموات بيتعمدوا ميشكروش فى زوجات اولادهم خوف من الحسد وعلشان الناس متقولش ان ابنها حظه حلو فى مراته .وانا اظن ان حراتك كده فلو خايفه من الحسد او حتى عندها كبرياء وعزه نفس ومش عاوزه تقول انك كويسه فلازم تعملي اللي عليكى وبس ومتسنيش منها مدح او ذم .ودى طبيعه الحياه مع الحموات وفى بيوت العيله

f وفاء فوزى ردت علي ابتسام محمد

اول مره اسمع موضوع الحسد ده .بس يمكن تكون غيره لانه ابنها وحيد او خوف من انها تسيطر علي البيت وتلغى شخصيتها

f هويدا حسن ...ردت علي صاحبه المشكله

انا شايفه إنك خلاص كلها كام شهر ورايحه لجوزك وعلي قد ما تقدرى مشي



حكايات من قلبه جروبات السنات

امورك معاها بنعم وحاضر ومنتظرش تقدير او شكر منها لان ده اللي بيتعب
اي ست سواء مع حماتها او مع جوزها
طول ما احنا منتظرين كلمه حلوه وتقدير معنوي بنتعب اكر

f ايمان الصاوي ردت علي صاحبه المشكله

...

هو في حا في الدنيا بتشكر في مرات ابنها ..اتي طالبه المستحيل
خليكي طبيعيه وعاملها كاتها امك وربنا سبحانه وتعالى شاهد علي تعبك
وليكي الاجر باذن الله
وركزي اتي بس في حياتك ومتكلفيش نفسك اكر من طاقتها

f ردت الكاتبة علي صاحبه المشكله [??]

اكر حاجه بتنعنا وتنكد علينا عيشتنا هي العشم
أيوه ..العشم في ان اللي قدامي يقدر تعبي
العشم ان الناس تاخذ بالها من اني مجتهده
العشم اني يتقال من ورايا كلمه حلوه
العشم اني اشوف معامله واحساس نفسي وحب من الاخرين
لكن الواقع اللي لازم نعيشه ان محدش هيقدرك ولا يقول فيكي كلمه حلوه
ولا هيشكرك
الا لو انتي قدرتي نفسك الاول وشوفتي انك عامله اللي عليكى كما تستطيعي



قلب مفتوح

وليس كما يريد الاخرين

ومخلصه كل الواجبات اللي عليكى تجاه نفسك اولاً ثم ابنك ثم بيتك واهل
زوحك

ولازم تعاملي حماك زي ما تحبها تعاملك ..يعني تعالي انتى كده وقولي قدام
الناس كلام حلو فيها ..وبادرى دايماً انك تشكوريها وتقوليها تسلم ايديك وتعبتك
معايا و...و...و..

هتلاقيا اتعدت منك

لكن الكلام الحلو معدي،...واخيراً بلاش تحكى لزوحك عن اي حاجه
وخليكى عاقله ومخك كبير وادعى ربنا ان الشهور الباقية تعدى علي خير وتنقلوا
مكان احسن ولوحذك

ربنا يسهل لك امورك يا رب





الحکایہ رقم [۸] معمولیے عمل انیے ابقیے قردہ

علي لسان صاحبه الحدودته او بالاخص صاحبه المشكله تبعت للجروب
وتقول

الموضوع ابتي لما عرضت عليا بنت عمي الكبيره صورته...ولقيته شاب
وسيم وفيه كثير من اللي كنت بحلم بيه ،، فتي احلامي يعني ،،، ومن غير
تفكير

وسرعه جدا قولتلها انا موافقه يا (هناء) ده زي القمر
وابقي عبيطه لو رفضته

ومن هنا بقي بدت سلسله التضحيات او التنازلات لاني جريت ورا قلبي
وأهوائي وفرحتي بعريس شكله حلو ونسيت الأساسياتوالشروط المهمه علشان
اي جوازه تنجح في الحياه ومكنتش عارفه ان الشاب الوسيم ده هيكون سبب
إني أألف وأدور علي المشايخ والدجالين واتعب وأمراض وأعاني في الحياه .
الناس دائما كانوا شايفني بنوته حلوه وعندي شويه من مقومات الجمال اللي
تعجب اي راجل .الناس اللي حواليا شايفني شاطره وعندي طموح وخصوصا
اني دكتوراه صيدلانيه ومن عيله محترمه

اهتمامي بالدراسه خلاني اتأخر شويه في موضوع الجواز وبالتالي فرصتي في
إختيارى فتي احلامي اللي بفكر فيه من سنين ضعفت واختفت وبقي كل كام يوم
تخبط علينا واحده صاحبه أمي او قريبه لينا من بعيد وساحبه في ايديها عريس
بمواصفات حلوه من وجهه نظرها طبعاً وتقولنا
انا جايه لعبير حته عريس انما ابيبيه



حكايات من قلبه جروبات الستات

وادخل واقعد معاه غصب عني لاني برفض فكره اني اكون سلعه يجي واحد
يتفرج عليا وبعدين يمشي ونستني معاليه يقرر ويقول عجبته ولا لأ
ففي كل مره بدخل اقعد مع العريس وانا بوزي شبرين ومش مرتاحه وواضح
عليا اني مغصوبه علي القعه دي وبالتالي العريس بيطفش
لحد لما بنت عمي الكبيره عرضت عليا صوره لاخو صاحبها وقالتي ايه رأيك
في (..محمد..) لو عجبك شكله هبعته صورتك وهيحي يقعد معاكي بس هو عنده
شرط بسيط

عاوز صوره ليكي بشعرك
وكان في مشكله صغيره وهي انه خريج معهد بس ايه بيشتغل في شركات
سياحه ومرتاح اوووي
الصراحه انا قلبي دق أول لما شوفت صورته ووافقته عليه من قبل حتي
ما شوفه

ما نتوا عارفين البنات دايمًا بيشردها الشاب الوسيم
المهم .جه ... وقعد معايا وكان ابن الايه لسانه حلو اووي وبيتكلم برابانط
وعنده غمازتين فوقعت في حبه
ولغيت عقلي تماما ووافقته علي كل شروطه
اللي كانت اولها اني اخلع الحجاب لانه مش مقتنع بيه
وثانيها اني مشغلش لانه مبيحبش شغل الستات
وثالثها اننا مش هنسكن في شقته التملك علشان بعيده عن شغله وهنسكن

في شقه ايجار جنب شركته

اخواتي الرجاله كانوا مش طيقينه ورافضينه تماما بس انا وماما كنا مرتاحينه
اووي وحابين الفشخره الكدابه والنرجسيه اللي كان فيها
وابتدينا رحله العذاب والشقي بعد الخطوبه وبان عليه انه بخيل جدا جدا
بالاضافه انه عاوزني اخس وألبس علي كيفه وعلاقاته بزميلاته في مجال السياحه
كانت اوفر اووي وفيها تجاوزات كثير مكنتش عجباي
لكن عجباي بيه وحيي ليه في نفس الوقت كان ساحرني ومخيلني زي المسحوبه
مش بجادله ولا بناقشه

ودايما بقوله حاضر علشان اعجبه ومش بجيب سيره دراستي ولا بتكلم عن
طوموحتي اللي وعدني انه يحققها لي في المستقبل
وبعد خطوبه سنه ونص اتجوزنا وما زال رأي اخواتي ومعظم اهلي فيه انه
مش مقبول وفيه من الحبث ما يجعلهم دايما في تربص لندالته
اتجوزنا طبعا في شقه ايجار قديم واهلي تقريبا اللي شالوا كل حاجه في الجهاز
علشان يمشوا الدنيا

وعلشان اجيب اللي نفسي فيه وبعد تاني شهر من الجواز لقيته اتغير معايا
بقي يرجع متأخر جدا من الشغل ورافض اني اتصل ابويه او اطمن عليه
ويقول لي انا מבحبش كده انا لما هفضي هطلبك

دايما سايب التلاجه فاضيه...دايما رافض يقربلي ويشتكي انه تعبان
شهر ورا الثاني كملنا سنه ومش عاوزني اخلف ولا اتكلم في الموضوع ده



وبرضه احنا لسه بنبتدي حياتنا
انا ابتديت ازهق واتخانق معاه كل يوم والحياه اللي انا عيشاها بقت صعبه عليا
وخصوصا ان اهلي كان كلهم كرم ومش حرمي من حاجه
لحد لما جه في يوم وقالي انا تعبان وعاوز اعترفلك بحاجه
قولته خير...قالي احنا لازم نروح لشيخ..
فقولته ليبيه حصل ايه
قالي انا كل لما اقرب منك بشوفك شبه القرد
وفي شبح بيطاردني كل لما افكر احجى جنبك
وابتدي ينام في اوضه تانيه وانا ابتديت من كتر كلامه وخرابتنا المتكرره
اصدق انه فعلا لازم نروح لشيخ
وبقي يقولي شوفي المايه اللي مدلوقه علي باب الشقه
واقنعني وروحنا بلد ارياف بعينه لشيخ والشيخ قال نفس كلامه
ويوم ورا الثاني وبقي ييات بره وميتصلش بيا ولا يسيلبي فلوس ولما يرجع
ينام علي طول علشان منتكلمش
السؤال هنا....

مؤخرا طلب مني اننا لازم نفضي الشقه الايجار دي ونودي العفش في بيت
ابويا

ونروح نقعد هناك علشان الشقه دي وشها وحش
واخواتي رافضين اني اسيب الشقه وخصوصا انهم اكتشفوا علاقته بصديقه

قلب مفتوح

ليه شافوه طالع نازل معاها وقالولي وانا مش مصدقاهم

هل فعلا اوافق ...

هل اطلب الطلاق

انا رغم نرجسيتها وبخله بس بحبه ومتعلقه جدا بيه ومش عارفه اعمل ابيه





التعليقات

(comments)

📍 (اميره صالح) ردت علي صاحبه المشكله
انتى بتسألني عن ايه بالضبط الحكايه واضحه ده واحد مبيجكيش واتجوزك
علشان يستفيد منك لازم تطلي الطلاق وتاخدي كل حقوقك انتى لو سيبتي
نفسك لقلبك زي اول مره هتخسري نفسك يا بنتي أنفدي واهررررري

📍 مروه الجندي ردت وقالت
لا تطلب الطلاق ازاي ده مراوغ ومش هيديها حاجه انا شايفه انها توافقه
وتأخذ العفش في بيت ابوها وبعدين تقوله مع السلامه
وبعدين انتى خايفه علي الشقه ومش خايفه انه يتجوز عليكى او يضحك
عليكى ويمضيكي بالتنازل عن كل حقوقك
اسمعي كلامي وروحي بيت ابوكي وهو أكيد لا يمكن يعمل حاجه وسط اهلك
والا ده بيتي جبار

📍 منال المهدي ردت وقالت
كان عندي واحده قريبتي وعمل معاها نفس الكلام ده وشككها في نفسها
وراح اتجوز واحده عليها لحد

قلبه مفتوح

لما خلعتنه دي دايمًا بتكون حيله لما الراجل ببشوفله شوفه تانيه وخصوصًا لو
هو من الاول مغصوب علي
الجوازه او مش عارف يجب مراته واحمدي ربنا انك مخلفتيش منه عيل ولا
اتنين كان زمانه مرمطك وراه
اطلبي الطلاق وحاولي تسيبيه بهدوء علشان متخسرش حقوقك

ريهام احمد ردت وقالت 

طيب ليه متتكلميش معاه وتشوفيه عاوزك ولا لأ الاول ما يمكن تكوني اتني
فاهمه الموضوع غلط جربي ومش هتخسري حاجه

جيهان ابراهيم ردت علي ريهام احمد 

اتني بتقولي ايه يا ريهام تتكلم ايه وتجرب ايه
ده واحد شككها في نفسها وركبها العفاريت علشان يخلص منها النوعيه دي
بتكون مريضه ونرجسي
بياخذ الست المتعلمه علشان يكسرها ويزلها ويسحرها بكلامه وبعدين ياخذ
اللي عاوزه منها ويرميها لانه مريض

ثناء مجدي 

متزعليش يا حبيبتني من اللي هقولهولك بس اتني اللي اتنازلتي من الاول
وقلتي من قيمه نفسك



وحسبتي الموضوع بالشكل مش بالعقل وخسرتي شغلك ونفسك والدنيا
بتجري والعمر هيسرقك ولو
استمريت في العلاقه المؤذيه دي هتفضل مريضه وبتعاني طول العمر
ربنا شرع الطلاق رغم ان أبغض الحلال علشان حاله زي حالتك دي لما تلاقي
راجل بايعك ومش عاوزك
ويخونك وانتوا لسه في بدايه حياتكم او مال هيعمل ايه بعد كده
استخيري حبيبتى وتوكلي على الله وخلي حد كبير من اهلك يقعد معاه
وشوفي نفسك ومستقبلك

رد الكاتبة علي صاحبة المشكله 

انا دايما بستعجب من تعلق بعض الستات بالراجل المؤذي ورغم انها شايفه
ندالته وقالة أصله الا انها
بتفضل شبطانه فيه وعاوزاه وده واضح جدا في مشكلتك يا عزيزتي
الازمه مش في الشقه ولا العفش لكن الازمه كلها في عيوبه اللي انتي بنفسك
بتوصيفها وشيفها بوضوح الشمس وكلام اخواتك عن احتماليه خيانتة وعلاقته
وبرضه انتي متعلقه بأمل انه يجبك ويشوفك وبتتججج بالعفش والشقه
انا عاوزاكي تسمعي كلامه وتعودي نفسك علي انسحابه من حياتك وتبدأي
من الان تشوفي دكتوراه نفسيه تتعالجي معاها وتفك مرض التعلق بيه وتعرفي
ان كرامتك اهم من العفش والشقه



الدكاية رقم [٩]
لو اخر راجل فية الدنيا ..متن
عاوزاه



روح زياره لخال جوزي ولقيته واخذني علي جنب وبيقولي اسمي يا بنتي
انتي حلوه واي راجل يتمناكي

ياريت متستغليش حلاوتك دي وتبطلي عملي علاقات مع زمايك في
الشغل وتركزي في بيتك وعيالك وكفايا قلّه ادب[?]

أنا هبتدي مشكلتي مش من بعبيد اووي وهحاول اشرح كل الظروف
علشان انا فعلا تعبانة ومحتاجه مساعدتكوا جدا

اتعرفت علي هيثم من حوالي ١٥ سنه لما جه الجامعه عندنا وشافني وانا في
اتحاد الطلبة وبتعامل مع زميلنا الاولاد والبنات بجرأه وبشخصيه مميزه وبأسلوب
محترم

وفي خلال يومين تلاته سأل عليا اصحابه وعرف انا منين وفين وجالنا البيت
وخطبني

هيثم وحيد ابوه وأمه اللي انفصلوا عن بعض من بعد ولادته بسنه واحده
بس واتربي ما بين امه وخلاته وعماته وكل عيلته تقريبا مكنش عنده بيت واحد
تقدروا تقولوا هو ده البيت اللي خرج منه

هيثم شخصيته كانت فيها ضعف وانانيه وجواه حقد نفسي وطبقي علي كل
اللي حوالينا سواء اصحابنا او جيرانا او حتي اخواتي واهلي وانا كنت دائما بلمتسله
الاعذار ويقول معلش علشان الظروف الصعبه اللي اتربي فيها وان ده غضب
عنه

كنت انا أمه واخته وصاحبته بخططله كل حياته وبساعده علي تخطي مشكله

وواقفه دائما معاه وجنبه في كل حاجه
المشكله بتبندي من اول ما كان بييجبرني اني أنزل اشتغل ويحي كل يوم
جايلي اترفيو في شركه شكل وبالعافيه
وانا مكنتش عاوزه اشتغل ولا انزل وقتها لان ولادي كانوا لسه صغيرين
وكان هو ظروفه الماديه كويسه بيتي امرط نفسي لبيه
اهلي كانوا بيلوموا عليه ويقولولوا الراجل يابني ميغصبش مراته علي الخروج
من البيت غصب عنها
يا ابني خاف علي مراتك دي حلوه وفيها الطمع ..وهو ولا كان بيتهمز من
كلامهم وكان شايف اننا لازم نشتغل علشان نعمل فلوس للمستقبل
دائما كان بيعجيب اصحابه الرجاله البيت عندنا يسهروا معانا من غير زوجاتهم
وانا اقول عادي وهو اوبن مايند وكده ولما كان راجل من الجيران يتكلم معايا علي
السلم او في مدخل العماره مكنش بيزعل ولا بيضايق
ومرور السنين ولما ولادي كبروا شويه انا زهقت من قعده البيت وتعبت
من زنه عليا بالشغل وكان كانت مشاكلنا كثير بسبب سلبيته وشخصيته الضعيفه
وعدم تحمله المسؤليه
ضيفوا بقي انه شخص أناني جدا ومعاملاته الماديه فيها بخل عليا وعلي ولاده
يعني ممكن يروح يشتري قميص ب ١٠٠٠ جنيه لنفسه وبرفان معرفش
بكالام ويحي لحدي أنا وولاده يستخسر فينا ويقول الظروف
امه توفت وورث عنها مبلغ محترم وكان مفروض يحصل انفراجة ونقله في



حياتنا لكن البخل زاد

وانا ربنا كان وفقني واشتغلت في منصب حلو مع شخصيات مهمه وقدرت
اثبت نفسي واعمل دراسات عليا وكورسات والكل كان بيشهدلي بشطارتني
وذكائي وحيي للعمل

وبقي عندي مرتبي الخاص

ابتدي يطلب مني فلوس علشان يسبني اخرج ولو اتأخرت لازم اسيب
فلوس للاولاد علشان يشتروا اكل من بره

وابتدي ياخذ مرتبي اول باول .ومبقاش يفرق معاه انا فين وبكلم مين الاهم
اني احيب فلوس

ويعلم ربنا انا كنت بتعب في الشغل بتاعي ازاي وبقي محتاجه اشترى لبس
وميكياج علشان منصبي الاجتماعي وشعوري انه مش مسؤول ورامي المسؤليه كلها
عليا كانت بتنزله من نظري اول بأول

وبقينا نتخانق كل نص ساعه علي اي حاجه وكل حاجه والجيران يسمعو
صوتنا ويطلعوا يحوشوه عني وهو بيضربني

وفي يوم لن انساه ابدأ اتخانق معايا بالليل وشديني من شعري ورماني بره
البيت لما اكتشفت انه علي علاقه بيذت ويروح لها البيت ويصرف عليها

رماني بره بيتي واخذ عيالي وانا بيني وبين اهلي اكثر من ٣ ساعات
ومكنتش عارفه اروح فين وازاي وقعدت عند الجيران اللي كانوا ارحم بيا منه

ومن الف واحد زيه

قعدت في بيت اهلي واخواتي اكثر من سنه وهو واخذ ولادي وهدومي
وحالي ومانعني من دخول بيتي

ولما اصحابي اتدخلوا اكتشفت انه شاكى لطوب الارض مني وقايل لكل من
هب ودب كلام كذب عني علشان بيرر فعلته بضره ليا وطردني من بيتي
لدرجه ان واحد من اصحابه كلمني ويقول ده يقول انك فيكي كذا وكذا وانك
اللي مش عاوزه تعيشي وشايفالك شوفه تانيه

جيرانني واصحابي واهلي كلمهم وقال كلام وحش في عرضي وحتي وانا اقولهم
لو انا وحشه كده طيب سايبني علي ذمته ليه ومش عاوز يطلقني
انا اعصابي تعبانني جدا ونفسي اخلص منه واتطلق لكن هو مش راضي
ومتمسك بيا ويهددني باولادي انه ياخدهم مني

سمعتي بقت زي الزفت من كتر الكلام القدر اللي بيقوله عليا لكل الناس
اتعرضت لاصحابه اللي مش كويسين يتصلوا بيا ويعاكسوني ويعملوا نفسهم
بيصلحوا بينا وهما عاوزين يشوفوني نظامي ايه

بعث ناس تراقبني في الشغل ويسال عليا الموظفين اللي هناك
حتي لما روحت اشتكي لخاله علشان ينصفني لقيته بيقولي بطلي علاقاتك
اللي بتعملها مع زمائلك

انا يومها جاني انهيار عصبي ووقعت من طولي. هو في كده ؟
ازاي بيقول عني انا اللي عشت معاه السنين دي كلها الكلام ده
ازاي مش فاهم اني ام عياله



حكايات من قلبه جروبات الستات

ازاي عاوزني استحمل وارعله وهو مش راجل ومعدوش ربحه الرجوله
للاسف انا ابويا وأمي ماتوا واخواتي الرجاله الله يساعهم عايشين لنفسهم
وملهمش دعوه بيا ومش بيقفوا في صفي ولا يجيبولي حتي
انا بين نارين معديش شقه اعيش فيها بره وخايفه ياخد ولادي لو رفعت خلع
وشغلي بقي محمد بسببه وبسبب خناقاته ومشاكله اللي بيفرج الناس علينا كل يوم
ارجوكوا ..انصحوني انا بموت حرفيا اعمل ايه...؟؟؟



التعليقات

(comments)

زينب الماضي ردت علي صاحبه المشكله 

حبيبتى ولا تزعلي نفسك حسبي الله ونعم الوكيل ده مش راجل اصلا يتعاش
معاه ..بيخوض في عرضك وبيتكلم عنك مع صحابه وفي الاخر عاوز يعيش معاكي
وياخد شقاكي وتعبك لازم تطلقي يا حبيبتى وتشوفي مكان تعيشي فيه ولو عيالك
صغيرين هتاخداهم في حضانتك

اليك المشتكى...ردت علي صاحبه المشكله 

ايه ده ايه ده .هو في كده .ايه الراجل الديوث ده انا من اول ما قرئت كلامك
انه بيغصبك علي الشغل
وانا احتقرته
والله انتي غلبانه ولازم تستقوي كده وتجمدي وتشوفي محامي كويس .ياريتك
عملتيه محضر بالضرب
والتعدي عليكي كان فرق معاكي جدا وكنت بسهولة عرفتي تاخدي حقوقك

اماني عميد ردت علي اليك المشتكى. 

طيب ما الجيران كانوا شاهدين علي الواقعه وممكن ترفع قضيه وتكسبها من



غير محاضر

f هبه الله مجدي..ردت علي صاحبه المشكله
اصبري يا حبيبتى واحتسبي علشان خاطر عيالك ولو رجعتي بيتك خليكي
في حالك وهو في حاله وربي عيالك
انا عارفه يعني ايه ست مفيش وراها اخ او اب او سند بتتهدل آخر بهدله
شوفي حد يقعد معاه يمكن يرجعه عقله

f ساميه توفيق ردت علي هبه الله مجدي ..ترجع ايه وتعيش ازاي ده
راجب ناقص وديوث ومش محترم
والنبي يا جماعه اللي ينصح يفكر في كلامه الاول قبل ما يقوله .بلاش حرق
دم

f دعاء النجار...انا لله وانا اليه راجعون ..هي الدنيا جري فيها ايه
..معلش يا حبيبتى باذن الله ربنا هيحيلك
حقك بس خليكي قويه ومتضعفيس وواجميه وبهدليه وعالجي الفضيحه بانك
تفضحيا ..يعني اتى
كمان كلمي كل الناس وعرفيهم حقيقتوا

رد الكاتبه على صاحبه المشكله 

الرجاله اللي من النوع ده يا عزيزتي بقوا كثير وموجودين في كل مكان .. راجل كل اللي يشغله الفلوس ومش مهم مراته تتعب او تسهر المهم تجيب فلوس فعلشان كده اللي زي ده ميتقالش عليه راجل ولا ينفع اب لاولادك .. انتي لازم تحاولي تطلقي منه وتاخدي ولادك وتبعدي وتربيهم على الرجوله والاخلاق وخوف ربنا وميقاش قعدتك معاه وخضوعك ليه لمجرد انه ابو، عيالك استتلي بحياتك وحافظي علي شغلك لانه مصدر أمانك بعد الله سبحانه وتعالى، وادعي ربنا دائما يكفيكى شره ويعوضك خير في اولادك



الحکایہ رقم [۱۰] عازرہ عروسہ علتان جوزیہ

انا ست عمري فوق ال ٤٠ سنه . متزوجه وعندي ولدين في سن العشرين
وجوزي اكبر مني بحوالي ٣ سنين .. دائما حاسه تجاهه بالذنب وده لانه راجل
محترم ومهذب وابن حلال ويحبني بس انا ولظروف ما حاسه اني مقصره
تجاهه في المشاعر والمعامله والاحتياجات الاخري وهو لانه متربي بمبرضاش
يضايقتي ويحترم تقبلاتي المزاجيه وظروفي الحياتيه

انا طبعا عارفه ان في منكم بيسأل نفسه .. ايوه يعني اتني فيكي ايه وما هو
السبب اللي يمنعك من سد احتياجات زوجك واسعاده ؟؟؟؟؟؟؟

بس انا من بعد وفاه امي وابويا بقيت خلاص رافضه اي حاجه في الدنيا
وعندي زهد فيها وعاوزه بس افضل مع ربنا أصلي واصوم واقرا قرآن واشوف
بيتي وعيالي واهتمامتهم وبس ومش قادره أوفيه حقه
ولا أكون حتي لطيفه معاه لا بالكلام ولا بالافعال

انا عارفه اني ممكن كده أكون محتاجه علاج نفسي واتابع مع دكتور وانا فعلا
بفكر اعمل ده بس قبل ما اروح اتعالج لازم الاول اطمن ان في زوجه تانيه
بتاخذ بالها منه وبتلبي احتياجاته

المهم إنى أتكلمت مع ناس كتير وطلبت منهم يشوفولي عروسه لزوجي في
منهم طبعا كان بيسخر ويتنمر ويتريق ويقولوا الست دي اكيد مجنونه وفي اللي
تفهم ظروفي وحس بالمشاعر اللي بحسها

لحد لما لقيت بنت من بلد أرياف عمرها ٢٨ سنه ومحترمة وجميله وبنت



ناس وكانت متجوزه من قبل

وعلشان تأخر الحمل والحلقه اتطلقت ...فانا قولت بسسسسس.هي
دي اللي بدور عليها وطبعاً هو كان رافض وقعدت كتير اقنعه بان ده الحلال
وده الشرع وانت مبتعملش حاجه تغضب ربنا وان انا مش زعلانة وهتكون
معانا في نفس البيت لكن في شقه تانيه وحاجات كتير علشان اقنعه لحد لما
في الاخر وافق
الحمد لله ..

واتجوز من سنتين ... في الاول البنت كانت كويسه ومحترمه وبتسمع كلامي
ومش بتحاول تزعلني لكن
فجأه كده وبدون ترتيب بقت تمنعه عننا وتبعده عن ولاده ومبقاش ينزل
يقعد معانا زي الاول وبقي دايماً عصبي وزبي ما يكون بيخاف لتعرف انه معانا
او بيكلمنا

انا لسه بتعالج عند دكتور نفسي وماشيه ع العلاج وانطفاء شغفي تجاهه
كزوج موجود ومش عارفه هينتهي امتي لكن ابتديت اتخفق من تغيير طباعه
مع عياله وكأنه مش ابوهم
انا كنت بجوزه علشان يفضل سعيد ويعوض التقصير بتاعي مش علشان
يبعد

انا فعلاً تأييه ومش عارفه اعمل ايه واتصرف ازاي

ياريت حد يعرفني ويقولي هل اواجه البنت ولا اتكلم مع جوزي ولا

ايبييه؟؟

وبلاش تقطيم فيا بالله عليكموا أنا مش ناقصه [?????]



التعليقات

(comments)

ردت ام ساجد علي صاحبه المشكله 
والله هو ابتلاء للست مش تروح هي تجيبه لنفسها لكن لو حصل
واتعرضت ليه حقها تكمل
أو تنفصل.... هو مش حرام ... هو محلل ليه اربعه وده شرع ربنا مش
مختلفين فيه ... لكن من استطاع
منكم الباء ... يعني معلقة بالاستطاعه... الاستطاعه الماديه والمعنويه ... في
مجموعه من الناس
متبين فكرة أنه ضرورة التعدد ... وفي ناس تقريبا بيحرموه ويجرمه كمان
لكن هو لا حرام ولا فرض
عين وبرده انت مخيرة تكملی أو تنفصلي... فكره بقي انك انت اللي
تدورى ده مرفوض الحقيقه
.... ليه اكلف نفسي المالا طاقه لنا بيه السيده عائشه كانت بتعمل ايه
لما رسول الله يقبل على فكره
الزواج ولا لما قالت على ستنا صفيه يهوديتك..... بس الغيرة دى في
فطرتنا... بشكل قوى نخرتها بقي وبلاش استفزاز....

f أما انيسه عبد الودود فردت وقالت

التعدد شرع ربنا طبعاً

والنبي عليه الصلاة والسلام تزوج أكثر من واحدة، ولكن امهات المؤمنين كانوا نساء طبيعيين وعندهم الغيرة الطبيعية اللي عند اي ست طبيعية

ومشوفناش واحدة منهم راحت جابت زوجه للنبي

فاللي بتعمل كده ده تنطع، وفكرة نفسها فوق البشر سيديه هو يدور ويتجوز

وابني ارضي انت انما انت

اللي تدوري؟! معلش ده عبط واستغباء وتنطع وفكرين نفسكم دينكم احسن

من أمهات المؤمنين

وحتلبس في الحيط لما يتجوز،

وحتلاقي مشاعر تانيه خالص عمرها ما فكرت فيها، ده لو هي انسانه طبيعية

اما لو مش انسانه طبيعية واتزعت منها المشاعر بقة فبراحتها

ازاي ست تفكر ف الموضوع ده اصلاً مجرد فكرة ان واحد تشاركي ف

جوزي ممكن تجبلي انهيار

عصبي انتو عايزين تدورو لازواجكم ع عروسه اللي هو ازاي يعني تبقي

عارفه انه يقولها نفس الكلام

الحلو اللي يقولو ليكي و بيعمل معاها نفس اللي بيعملو معاكي و عايش معاها

كل التفاصيل اللي بينكم

ده لما واحدته بهزر مع زوجي ممكن قلبي يغلي من الغيظ و دمي بيتحرق



f رشا العوام ردت علي صاحبه المشكله
الانسان ميستناش حد يجبره
يجبر نفسه وميظلمهاش ويحملها مالاتطبيق بحجة افرح غيري
ليه يفتح على نفسه باب شر هيزيده تهلکه وعذاب ليه ستشرف الفتنه
وارحب بيها ??? وهى سبب تهلکه ليا
وبعدھا يفضل عايش بيسعى ويدور على اللى يجبرخاطره لحد مموت
انتوا وكأنکم بتقولوها کملی فی ضعفک دا
تفوق کده وتصحح ومتدورش ولا تمرض نفسها زياده بالتفكير
تسيب اقدار الله تتساق
هو بقى جه وقالها هتجوز وهى وافقت
بيقى يتفضل مشكور يدور لنفسه
تشيل شيلته كامله ليه وتتعذب
ولنفسها عليها حق
دا احسان وعطاء مذموم مدام لا تطيقه
افهموا بقى كفايا ضعف باسم اصله مباح

f منال موسي ردت علي صاحبه المشكله
علشان الستات اللي بتهاجم المعنى أو قالت ان الزوج ما فيه خير او ان المرأة
كده تبقى اكسير ..متهيه الصلاحيه
فيه مثل حلو بيقول ” ما يحسش بالنار إلا اللي كابشها ”

ومش شرط أن الزوجة تزوج زوجها لانه وحش او هي أكسير ..منتهيه
الصلاحيه

ليه ميكونش لانه كويس لكنها بالفعل لا تستطيع منحه السعادة لانها ممزعه
النفسيه ومش عارفة تلتفت لتربية عيالها؟

ليه ما تكونش أم أكثر منها زوجة فتمله وقررت أنه يستحق الاهتمام الذي
لا تقو عليه؟

محدث عارف ظروف حد واللي بيحكم بظروفه وافكاره ومشاعره على كل
من كان انسان ما ينفعش للحكم لأن احوال الناس ونفوسهم وقدراتهم تتفاوت ...
ارحموا من يختلف عنكم

رد الكاتبه علي صاحبه المشكله 

طبعا انا لا ألوم عليك ولا اعاتبك علي اي خطوه اتتي سعيتي لها لانك اكيد
فكرتي الف مره قبل اخذها بس تعالي نفكر بصوت عال شويه

اتتي كنتي متخيله الحياه من بعد زواجه؟

هل كنتي عارفة إنك هتكوني مع زوجك في نصف حياة فقط؟

يعني حقك في زوجك والحياة المشتركة ما بينكم والأولاد وكل شيء حرقياً بدل

ما كان ٢٤ هيكون ١٢ ؟

عارفة دا وجاهزة ليه؟

ثم الأهم زوجك يستطيع التعدد ، هل هو نفسه جاهز لده؟

قادرانه يقوم في الحياة بدورين ويكون عنده حياتين مختلفتين قائم عليهم ولا



هيظلم نفسه..؟؟..

اعتقد انك سألتني نفسك بدل السؤال عشره واقدمتي علي الخطوه وانتي

ضميرك مرتاح

فأني تغيير الان في سلوك الزوج او في عروسه زوجك لا بد وان تتقبله

وان استطعتي انك تتكلمي معاه وتعاتبه وتحاولي تكسيها بالمعامله الطيبه اعلمي

كده فوراً

وبلاش جلدك لذاتك ولومك الدائم لنفسك لان الامر قد تم بالفعل فلوش

لازمه تقعدتي تقولي انا غلطت وانا عملت

واتمني ان تكلمي طريق العلاج النفسي وتكسي ود زوجك واولادك وتكسي

نفسك



الحكايه رقم [١١]
أخواتي بيتكسفوا يقولوا أني
اختهم



حكايات من قلبه جروبات الستات

انا اسمي سماح وعمري ٤٢ سنه عندي ٤ اخوات ذكور و ٢ اناث كلهم متجوزين وفي مراكز كويسه مابين دكتور ومهندس ومستشار وزوجه مدير عام والحمد لله ربنا موسع ارزاقهم

ابويا وأمي ماتوا من عشر سنين وقبل ما يموتوا كانوا شايلني في عيونهم ... الموضوع ابتدي من صغري

لاني كنت اقلهم جالا واقلمهم تعليم ..مكنتش بحب المدرسه وكت بسقط دائما في الدراسه ..وكت بحب اكثر شغل البيت والمطبخ . فاخواتي كانوا يذاكروا وينجحوا وانا اعملهم كل حاجه في البيت ومن هنا ابنت نقطه ضعفي .. كلهم دخلوا جامعات الا انا ...اكتفيت بالاعداديه ... ولما جالي فرصه للجواز كانت تقريبا الفرصه الأولي والأخيره ...كان راجل مطلق وعایش مع امه .. وانا طبعا بنت بنوت

الحقيقه وقتها ابويا كان موافق واخواتي كانوا راضين وقعدوا ينصحوني ويقولولي بلاااش .. هتعيشي في بيت عيله ومعاكي حمانك وهتاخذ راجل أكبر منك فبلاااش

لكن انا وافقت ..كنت عيله وعاوزه اخلص من شغل البيت والمرمطه وسط اخواتي وبصراحه دي كانت اول فرصه بعد وقت طويل المهم اتجوزت وكان خلفت .. ولسوء حظي طلع الولد من ذوي الاحتياجات الخاصه وعنده كمان مشكله في القلب

ظهر تعب ابني في نفس الوقت اللي ظهرت فيه المشاكل مع زوجي ومع اهله وحماتي وبقيت أجري علي ابويا وامي علشان ينجدوني منه ..ومحدش كان بيحيي

في صفي .. كانوا كلهم بيرددوا كلمه واحده (اختيارك يا مدام)

ومعندناش بنات تغضب او تطلق ...

وكت برجع بيتي ودموعي علي خدي وجوزي طبعاً يسوق فيها أكثر ويضربني

ويشتمني ويقول اهلك مش عاوزينك اتي ملكيش اهل

أكثر حاجه كانت وجعاني ومخليايني مضطره استحمل هو مرض ابني وتعبه

...فكنت بلف بيه علي كل مستشفيات مصر واجري يمين وشمال لوحدي

وجوزي كان شايل ايديه وكان سلبي ويقول انا مبحبش الواد ده

واهلي كمان كانوا دايماً بيهربوا من المسؤوليه بتاعتي وبتاعت ابني .. لحد لما

اضطرتني الظروف اني اشحت عليه واطلب المساعدة من ولاد الحلال .. علشان

أكفي مصاريف علاجه

..

ومكنتش بعرف اخواتي باي حاجه وهما كمان بطلوا يسألوا عليا ..

لحد لما في يوم كنت بنصف عياده دكتور زي ما بنصف الشقق كده علشان

اجيب فلوس وجاه شوفت اخويا الدكتور اللي اول لما شافني قعد يشتم فيا

ويزعقلي ويقول اتني عرتينا وفضحتينا منك لله ورمالي ٢٠٠ جنيه وطلع يجري

انا عملت كل حاجه علشان اعالج ابني ومنت في الشارع وعلي الارض

ومسحت سلام وبيوت علشان اجيب فلوس بالحلال .. وكل ده ومحدش منهم

قالني اتني محتاجه ايه .. اقصي حاجه كانوا بيعملوها هي مكلمه تليفون وسؤال من

بعيد لبعيد

انا ابني بيكبر قدام عيني ونفسي اطلق من الراجل السلبي اللي متجوزاه



..واخذ ابني وامشي بعبيد

محدث يعرف عني حاجه علشان معملش مشكله لحد ولا اضايق حد ..بس
خايفه من الزمن ومن اني اتعب او يحصلي حاجه وملقيش حد جنب ابني ،

...

ياتري لو مشيت ودورت علي اي شغل وخذته معايا هكون صح ولا غلط
....جاوبوني بالله عليكوا انا تعبانه

التعليقات

(comments)

ردت نيهال السيد علي صاحبه المشكله 
مترعليش من اخواتك اكيد هما كانوا عاوزين ليكي الاصلاح وانت كمان
طالما هما مفكروش فيكي طول السنين دي فلازم اتبي كمان تفكري في نفسك
ومستقبلك وابنك شو في ايه المناسب ليكي واعمليه

ايمان وهبه ردت علي صاحبه المشكله 
ربنا يشفيك ابنك ويعافيه ياارب .ان شاء الله ربنا هيجازيكي خير علي صبرك
علي مرض ابنك وصبرك علي زوجك وسليته وعدم تحمله المسؤليه ..وبكره ابنك
يكبر ويردلك الجميل وتشوفيه احسن واحد في
الدنيا ...

دوري علي شغل في مصنع او محل من غير ما تهدي نفسك وخليكي في بيت
جوزك حتي لو وجوده زي عدمه .

عبر صلاح الدين ..ردت علي صاحبه المشكله 
مش فاهمه يعني ايه اخوات يضايقوا من ظروف اختهم وكمان مبيسألوش
عليها ولما تتصرف وتدور علي مال حلال يعتبروا ده فضيحه



حكايات من قلبه جروبات السنات

معلش يعني مراكز ايه وشغل ايه اللي تخليهم كده..البنى ءادم مھما ربنا رزقه
وكرمه لازم يفكر ان الدنيا الي زوال وان ربنا هيسأله عن رحمہ وعن اخواته
ومعاملته ليہم ..وعلي العموم ادعي ربنا دائما يوسع رزقك ويعوضك في ابنك عن
اخواتك ومتحتاجيش لحد

رد الكاتبہ علي صاحبہ المشكلہ .

انا فخورہ بيكي بجد

فخوره بأم لم تستسلم لظروفها الحياتيه ولقدرها الغير مقبول من الاخرين
وتمردت علي ظروفها ولم تستسلم وفضلت ان تعيش بالحلال بدل من ان تذهب
والعياذ بالله لطرق الشيطان

وبقول الكلام ده علشان انتي كمان تفخري بذاتك ...

اما عن رأي اخواتك في تصرفاتك .فمش مطلوب دائما ان اخواتنا يكونا شهننا
او عندهم حنان وطيبه قلب تجاهنا ..وطالما قررقي الاعتماد علي نفسك يبقي لابد
وحتما ان تستقوي ومتوجعش قلبك باهتامهم من عدمه

ودايما اسألهم عليهم وتواصلني واطمني علي اخبارهم من بعيد لبعيد ..وكفايا
عليكي ابنك ربنا يعينك علي تربيتہ ويوفر لكي سبل العيش

واعرفي ان ملجأك الاول والاخير هو الله سبحانه وتعالى فقط

فاتجهي دائما نحو الله ..وستجدي الخير والسعاده باذن الله



الحكاية رقم ١٢ خطيبه أبنه عماله عمل



ابني خطب بنت السنة اللي فاتت...البنت جميله وبنت ناس ومحترمه وانا كنت مشجعاه وبدعيلهم ربنا يوفقهم ويتم لهم علي خير..بس من ساعه ما خطبها وهو بقي بعيد عن اخواته ودايما دايما قاعد عندهم ويخرج مع اهلها واخواتها..تقريبا كل يوم يخلص شغل ويطلع عليهم ولو عندهم مشاوير يروح يوصلهم وشغال لهم سواق بعربيته...انا الموضوع ده مضايقتي جدا انا وابوه وانكلمنا معاه كتير وفهمناه ان العيله الجديده مش لازم تنسيك اهلك واصحابك...من كام يوم اتنين من اصحابوا كمووني وقالولي يا طنط احنا مبقناش نشوفه خالص ولا بيرد علينا في الموبايل

انا خايفه تكون البنت عملاله عمل.. وخصوصا انهم من محافظه ريفيه ومعروف عنهم انهم بيعملوا اسحار واعمال وليهم في الطريق ده اللي مضايقتنا كان انا وابوه ان خطيبته ابنت متسألش علينا وتكتفي برساله علي الواتس وخلاص كل كام يوم...ابني جالي من كام يوم وقالي انا هكتب قائمه وهمضي عليها ومش لازم اتي ولا ابويا تحضروا علشان المشاكل..انا في الاول زعلت وحسيته لاغينا من حساباته خالص لكن بعد شويه قولتله زي ما تحب يا ابني..قالي بس بعرفكوا القايمه قيمتها ٦٠٠ الف جنيه

انا اتصدمت وصوتت في وشه وقولتله انت اكيد مش واعي ولا مغيب..ده العفش كله ميكلمش ٢٠٠ الف هتكتبوا المبلغ ده كله لبيه؟؟؟؟
قالي خلاص يا ماما علشان خطيبتي زعلانه وشايفه ان ده ضمان ليها وانا قولتلهم اكتبوا اللي انتوا عاوزينه انا شاري بنتكم ومش ناوي اطلقها....
هو مش فاهم انه كده هيجبس نفسه وهيروح في داهيه لو حصل خلاف

بينهم

ومش راضي يخليني ادخل في الحوار انا او ابوه ..
انا خاسه انه بتنصب عليه ومضحوك عليه منها ومن اهلها
اعمل ايه .. اكلمها واكلم اهلها من وراه ولا اعمل ايه
عرفوني قبل ما الفاس تقع في الراس و يرتبوا كل حاجه ..هل اسيبه يعمل
اللي هو عايزه ولا اتدخل حتي لو مش هيعجبه ده علشان انقذه من حاله النصب
والتوهان اللي هو فيها ؟؟





التعليقات

(comments)

ردت دعاء مسعود علي صاحبه المشكله وقالت
تدخلك اتني ممكن بالشكل ده يخليه يعند أكثر ويركب دماغه ..ياريت تخلي
حد من اصحابه او حد كبير يكون بيثق فيه يقعد معاه ويفهمه ان الزواج مش
بالفلوس والبعد عن الاهل وان اللي بيعمله زي اللي بيرمي نفسه في التهلكه

اسلام محمود ردت علي صاحبه المشكله وقالت
والله انا لو مكانك اسيبه يتربي ويعرف ان الله حق .ازاي واحده مهما كانت
تاخده من امه وابوه واصحابه وتضحك عليه بالشكل ده وازاي هو يلغي وجود
ابوه وميكبروش ويقعده في اتفاق زي القايمه دي .اتني فعلا معاكي حق دي اكيد
سبحراه

نجوي مرسي ردت علي صاحبه المشكله وقالت
انا مصدومه من اللي بسمعه .المفروض هو يحاول يدمجها في اهله ويجبها فيهم
مش يندمج فيهم لدرجه تنسيه اهله وصحابه وناسه ..يجد انا صدقتك ان ممكن
يكون عماله عمل ..اوعي تستسلمي ولازم تدخلي وتحاولي ترجعيه لعقله وناسه
لحسن تفوق علي مصيبه والعياذ بالله او كارته ووقتها مش هينفع الندم

كوتر السقا ردت علي صاحبه المشكله وقالت ...

القايه كده سعرها مبالغ فيه اوي ...اطلبي من اهلها لو ناس عاقلين تشوفي مفردات القايه من غير متعري في ابنك وبالعقل والادب فهمهم ان ده كده كتير ومش قانوني وان وجود البنت مع راجل يخاف عليها ويحميها ويتقي الله فيها اهم بكتييير من وجودها مع راجل كاتب لها قايه بمليون جنيه بس بيصبحها بعلقه ويمسيها بعلقه

ردت الكاتبه علي صاحبه المشكله وقالت

عزيزتي الام الغاليه ..انا مقدره غيرتك علي ابنك وزعلك علي تغير حاله ..بس عاوزه اقولك ان الانهار والانسحال ورا عروسته ده بيكون بس في الاول ..لكن بعد الجواز بيكون

خلاص راح الانهار وبقت ست عاديه واهلها كان عادين وبيحن طبيعي لامه وابوه

خليكي اتتي ام حنونه واسمعيه وخديه في حضنك لما يجيلك ومتظهيرش خوفك ده قدامه علشان هو كان ميروحش يدور علي صدر حنين غيرك اما بخصوص القايه فده مطب صناعي بيكون في كل الزيجات ..اتكلمي مع ابنك بهدوء وفهميه ما له وما عليه علشان بيقى هو متحمل نتيجه غلطه اذا بعد الشر حصل اي حاجه بعد الزواج ...ويا سلام لو في حد عاقل قريب من ابنك ويتكلم هو معاه



حكايات من قلبه جروبات الستات

خطيبه ابنك عجينه هتشكليها علي كيفك ..لو اديتها حنان وحب وعاملتها
زي بنتك ..هتديكي حنان وحب ...وده مش كلامي ..ده كلام سستات كتير
قالولي ان

علاقتهم بمرات ابنهم حلوه وزى الفل علشان مبيدخوش في حياتهم ودايما
بيعاملوهم كأنهم بناتهم

خافي ربنا فيها واطردي من دماغك فكره انها سحراله وعملاله عمل والكلام ده
....علشان ده مدخل شيطان بينكوا وربنا يصلح لك الاحوال ويكمل له بالف

خير





الحكاية رقم (١٣)
تزينوا أيها الرجال برحمكم الله



حكايات من قلبه جروبات الستات

الموضوع يا اصحابي اني مخنوقه جدا وهيجرالي حاجه ..دايما اسمع كل الناس بتتكلم عن ان الراجل لازم يشوف مراته نضيفه ويرحتها حلوه ومهمته بنفسها وان ده سبب لاستمرار الحياه وحبه للست بتاعته ولييته واسرته طيب بالنسبه للراجل مش برضه لازم يهتم بنفسه وشكله ونضافته ولا ده مطلوب من الستات بس انا متحوزه من ٦ سنين ..وخلال السنين الكثير دي بحاول مع جوزي اعلمه يستعمل مزيل عرق وبرفان ويكوي هدمومه وهو نازل ويلبس كاجول في المناسبات السريعه وفور مال في اجتماعاته وشغله وفي حاجات نجحت فيها وفي حاجات فشلت فيها ..اللازمه كلها في اني حد نضيف ويهتم جدا باللبس والريحه ومحب الشياكه وهو علي عكسي تماماااا حد عشوائي وميحبش النظام .والريحه والنضافه عادي بانسباله ..ممكن يهتم بيها وهو نازل انما مع اهل بيته ممشيا بالبركه ..فطبيعي الست بتاعته تبقي لابسه ومتشيكه في البيت لانها ست انما هو لابس اي حاجه وممكن يفضل بلبس الخروج اكثر من ١٢ ساعه ويكمل بيه لحد النوم ولو اتكلمت معاه في اننا بنحتاج تغير كذا مره وناخد شور قبل ما نزل وبعد ما نرجع ..بيسمع حلوه لكن التنفيذ، مفييش،

الموضوع امتد لابعد من كذا وانا مش قادره اتكلم مع حد في ده واصبحت حالتي النفسيه وحشه وبقيت بيعيط ومكتئبه وهو ولا حاسس بيا الموضوع اصبح بيكرهني في اي قرب منه فبقيت مجبره علي القرب بالاكراه كأني في سجن ...

كلمته كثير وسمعتة كلام مره بطريقه حلوه ومرات بالتلميح والصراحه بس

قلبه مفتوح

تعبت من اهماله

حتي وزنه بقي زايد جدا .لدرجه ان الناس بتقولي كده في وشي اشمعني اتتي
مهتمه بنفسك وهو، بيتخن كده

بس هو مش حاسس ان وزنه ده مآثر علي علاقتنا وقربنا ومكرهني في
الامر كله ..

انا بجد تعبت ..لو حد عنده تجربه تشبه كده مع زوجها ..ياريت تعرفني
وتدلني اعمل ايه بالله عليكوا





التعليقات

(comments)

ردت فاطمه مرزوق علي صاحبه المشكله 
انا طبعا معاكي قلبا وقالبا ..ان النضافه الشخصيه والاهتمام بالنفس مش
مقتصر علي الستات بس ..وضروره للطرفين لانه سبب في الترابط والحب
والعيشه الهادئه
وزي ما العين بتعشق كل جميل ..برضه الانف تعشق الروايح النضيفه ومش
لازم برفنات وغيره ..ريحه هاديه وبس
بس ربما هو متعلمش كده في بيت اهله وانتي لسه المشوار معاكي طويل ..لا
تياسي من انك تعلميه وتوجهيه وباذن الله يتغير

هبه مراد  ردت علي صاحبه المشكله وقالت
يؤسفني الشعور اللي انتي بتشعري بيه الان وحاسه بيكي
لاني مريت بنفس التجربه مع زوجي ..ومكنش في حل فاضطريت للطلاق
بس انا مبنصحكيش بالطلاق .وانصحك انك تحاولي طالما انه بيتقبل النقد
انما انا جوزي مكنش بيتقبل خالص وكان بيضرنني وبيتعمد يهمل في نفسه اكثر
معايا ويهتم بره البيت لدرجه اني كنت شاكه انه عايش بشخصيتين ومنهم واحده
قاصد بيها يدمرني نفسيا

حاوولي حاوولي حاوولي ..ولا تيأسني وباذن الله لو يبحبك هيتغير علشانك

f أميره مرزوق ردت علي صاحبه المشكله

طيب ابدأي الاول بأنك توجهيه لدكتور ويعمل رياضه لانه لو خس هيهتم
بنفسه ويشوف حاله صغر ويلبس ويتشيك وواحد واحد هتلاقيه عاوز يلبس
الكاجوال والفورمال

احنا نفسنا اوقات لما بنتخن بنسبي حالنا ونلبس عبايات وشباشب واي
طرحه ونفضل ناكل ناكل ومبيمنناش لا ريجه ولا شكل
جري بس كده وربنا يعينك واوعي تتكلمي في ده مع أي حد يعرفه واعتبريه
سر حياتك واوضه نومك

f رد الكاتبه علي صاحبه المشكله

اولا ..انا اسانك نفسيا في حزنك علي حال زوجك ورغبتك في ان يكون
افضل

ثانيا ..اطمئنك ان معظم الازواح في بيوتهم عشوائين زي زوجك كده الا
من رحم ربي

بس في زوجات عادي الامر بالنسبالها وفي زوجات زيك الموضوع بيكدر
عليها عيشتها

ثالثا ..تعالى معي نضع خطه لحل هذه الفوضي وصنع رجل جديد تحبيه داخل
وخارج بيتك



حكايات من قلبه جروبات السنات

ماذا لو اعتبرته ابنك وساعدته علي التغير ولكن بكلام لطيف وظريف
مستغله انه يقبل النقد وكان حبه ليكي
جهزيه دائما الحمام ولما يرجع من الشغل بطريقه ظريفه بلغيه انك حطيتي
شاور جديد

والحمام سخن وبدلع كده قوليله لازم تاخذ شور
ودي نفس الطريقه اللي بنعملها مع اولادنا لما بيرجعوا من التمرين ورافضين
يغيروا
و يستحموا

وتعالى بقي للبس البيت وحطي كام طقم بتحببيه وقوليلوه انا احب اشوفك
باللبس ده كمان استغلي وقت مناسب وكلميه عن حديث النبي صل الله عليه
وسلم عن ضروره قص الاظافر نتف الابط وحلق العانه وكانك بتوجهي الكلام
لحد تاني او فيديو، وابعتهوله علي الواتس
الموضوع هياخذ منك وقت وعزيمه وباذن الله مع الاستمرار والهमे هيتغير
وينصلح حاله وتشوفيه راجل حلو ومرتب ونضيف كما تتمنين يا عزيزتي

الفهرس

٦	إهداء
٧	المقدمه
١٠	الحكايه رقم (١) أنا وصاحب أخويا والشيطان
١٧	الحكايه رقم [٢] زوجي متعدد العلاقات
٢٤	الحكايه رقم [٣] فيديوهاش وصور بنتي مع كل الناس في مدرستها
٣٠	الحكايه رقم [٤] أبويا رافض جواز الأقارب
٣٨	الحكايه رقم [٥] عريس بعياله ولاا تجميد بويضات؟
٤٦	الحكايه رقم [٦] أنا بكره أمي [???
٥٤	الحكايه رقم (٧) حماتي والبهائم
٦٣	الحكايه رقم [٨] معمولي عمل اني أبقى قرده
٧٢	الحكايه رقم [٩] لو اخر راجل في الدنيا..مش عاوزاه
٨١	الحكايه رقم [١٠] عاوزه عروسه علشان جوزي



- ٩٠ الحكايه رقم [١١]
أخواتي بيتكسفوا يقولوا أني اختهم
- ٩٦ الحكايه رقم ١٢
خطيبه أبني عملاه عمل
- ١٠٢ الحكايه رقم (١٣)
تزينوا أيها الرجال يرحمكم الله
- ١٠٨ الفهرس